






2 our en 1 vol.

C 224. 947

H. 3198

par Antoine Arnauld



Cros.

LE
FRANC ET
VERITABLE DISCOVERS
AV ROY:

*SVR LE RESTABLISSEMENT
qui luy est demandé pour les Iesuites.*

M. D C. X.

Iouste la coppie imprimée en l'an 1602.

W. A. C. E.

SAVOODS DEPARTMENT

Case 1702-1A

F

TWINTHILL DIST. 7.1.7.11

39

THE NEWBERRY
LIBRARY


326

161022



LE FRANC ET VERITA-

*ble discours au Roy? sur le restablissement
qui luy est demandé pour les Iesuites.*



SIRE, Il est difficile que sur tant de prieres qui vous sont faites de plusieurs endroits pour les Iesuites : & sur tant de raisons aussi qui vous sont alleguees au contraire, vostre esprit ne soit diuersement agité.

I'AY estimé que vostre Majesté seroit soulagee de voir en bref ce que ie me suis proposé de part & d'autre, laissant plusieurs considerations de peu de consequence, & ne m'arrestant qu'à celles qui sont pesantes, & qui peuuent toucher l'esprit d'un grand Roy, en matiere tres-importante, & où il est necessaire de se resouldre promptement.

LA verité est donc, SIRE, qu'en remettant les Iesuites, vous donnerez beaucoup de contentement à un bon nombre de Catholiques de vostre Royaume, qui les estiment utiles pour retrancher les opinions nouvelles en la Religion : & par mesme moyen vous obligerez la plus grande partie de Messieurs les Cardinaux, qui les affectionnent pour beaucoup de raisons : & mesmes d'autant qu'ils supportent de grands travaux pour estendre & la

4
foy Catholique , & la puissance de sa Sainteté par toute la terre. Gens actifs, diligens, soigneux & courageux , ausquels la chaise a beaucoup d'obligation : ils sont venus en vne saison pleine de difficultez.

VOILA, SIRE, les grandes & principales raisons qui vous peuuent mouuoir d'un costé : Car ce qu'on vous allegue de l'instruction de la ieunesse, est peu considerable : d'autant qu'avec verité, tout bien balancé ils ont, plustost nuit que profité aux lettres. Et en voici la raison en un mot.

AVPARAVANT qu'ils fussent venus en France, tous les beaux esprits, tous les enfans de bon lieu estudioient en l'Vniuersité de Paris, où il y auoit tousiours vingt ou trente mil escholiers, tant François que Estrangers. Cette grande multitude y attiroit tous les plus doctes & plus celebres hommes de l'Europe, soit pour paroistre, soit pour profiter. Les places de Lecteurs publics instituees par le Roy François premier, estoient recherchees & retenües dix ans auparauant par les lumieres des lettres. En la seule Sale de Cambray se faisoient lors de plus belles & plus doctes leçons en un mois, que depuis par toute l'Vniuersité en un an, compris les Iesuites. Qui ont trouué moien des'establiir petit à petit en toutes les meilleures villes du Royaume : & en ce faisant, ont coupé les sources d'où venoit cette grande multitude d'escholiers : & par mesme moien ont fait cesser un autre grand bien, qui aduenoit à la ieunesse estudiant à Paris, laquelle se ciuiliisoit d'auantage en la langue Françoisse,

& aux mœurs, & en affection enuers le general del'Estat, qu'elle n'a fait depuis, ne fortant point des Prouinces.

IL Y A encore vne raison remarquee par l'Vniuersité de Padoue, se plaignant d'eux à la Seigneurie de Venise en quatre vingts & vnze, lors qu'on leur fit defenses de lire à autres qu'à eux mesmes: C'est que leur principale estude estant la Theologie, ils ne laissent ordinairement en toutes leurs classes (excepté la premiere) que de ieunes hommes qui s'apprennent plustost qu'ils n'enseignent. De sorte que les enfans demeurans ainsi iusques à quinze ou seize ans entre les mains de gens peu sçauans, ne deuiennent gueres grand personages: aussi nous voions qu'il y en a peu qui paroissent aux Compagnies. Cela se recognot clairement en quatre vingts quatorze, lors que l'Vniuersité de Paris presenta sa requeste contr'eux: ils chercherent quelque habile Aduocat de leurs escholiers pour les defendre (ce qui leur eust aucunement serui:) Ils trouuerent assez de gens instituez par eux, & de tons aages: mais nul capable de soustenir vne grande cause, & leur fallut auoir recours à vn tres-bon Aduocat, mais qui n'auoit iamais rien appris d'eux. Ils forment les leur plustost à la contemplation, qu'à l'estude & à l'action. Entre les Medecins, qui est vne fort sçauante faculté, on voit peu de leurs escholiers qui reluisent. Quant aux lettres humaines, & le secret des langues, ils s'y addonnent encores moins. Et à la verité, leur vraye profession est la Theologie, c'est leur talent, leur

Marathon, ils y sont fort versez, ils choisissent de bonne heure des esprits esueillez & aigus : ceux qui tombent entre leurs mains, ne leur eschappent gueres : c'est vn meſlange de diuerſes nations, ils s'entraident, & conferent leurs eſtudes. En fin, il faut que chacun confeſſe qu'ils excellent aux diſputes ſur cette ſcience, la Roine des autres.

Q V A N D ie dis qu'ils ne ſçauent point le ſecret des langues, ce n'eſt pas pour denier que parmy eux il ne ſe trouue des hommes de ſçauoir mediocre aux lettres humaines: mais i'entens qu'il n'y faut pas aller chercher des gens ſemblables à ces quatre gloire des Gaules, Rois des lettres, tels recognus & confeſſez par tout le monde, dont trois viuent, & le quatrieſme encores par ſa meilleure partie.

T O V S les Ieſuites qui furent iamais, à grande peine meriteroient-ils le nom de diſciples de l'vn de ces quatre: & m'aſſeure que ceux qui ſçauent quelque choſe entre-eux, le recognoiſtront ainſi. Mais ils reſpondront, qu'ils ne s'y ſont pas addonnez, & que leur principal but eſt la Theologie, & diront vray.

E N C O R E S doit-on remarquer, que ceux qui parmi eux ont quelque ſçauoir notable, ne s'amuſent plus à enſeigner les enfans. Car ils s'addōnent auſſi toſt à l'eſtude de la Theologie, où eſtans aydez du labeur des plus grāds perſonnages d'entr'eux, ils ſe mettent à eſcrire: & faut confeſſer qu'ils profitent grandement en la deſenſe de noſtre Religion Catholique, contre les eſcrits de nos aduerſaires. Et parmi ce grand nombre il s'en eſt trouuē vn

ou deux qui ont la diction belle, le styl hardy, les mouuemens esleuez, la disposition bonne, & mille belles poinctes. En fin, si ie suis capable d'en iuger, les requestes qu'ils ont presentees à vostre Majesté, sont deux belles pieces, & ausquelles tout ce que les grands maistres en cet art ont enseigné, se trouue curieusement obserué. Certes leur cause ne pouuoit estre mieux defenduë.

OR QUE ce grand trauail en l'estude de la Theologie n'ait aigri contr'eux ceux de la Religion pretenduë reformee, il n'en faut point douter: Mais aussi qu'il n'y ait beaucoup de choses en leurs actions, voire en leur doctrine, qui les font hayr par de tres-grands Catholiques, qui ne leur cedent rien en deuotion, cela ne se peut dénier. Je ne parlerai que, d'un poinct (car il ne faut pas abuser de l'audience d'un si grand Prince :) mais certes certui-ci la merite, si autre chose quelconque, puis qu'il y va de tout.

SIRE, entre les Sorbonistes, il s'en est trouué quelquesfois, mais peu & rarement, qui se laissans persuader aux raisons colorees de ceux qui ont faict à Rome des discours sur la puissance des clefs, ont voulu mettre en auant, que les Papes pouuoient excommunier les Rois, & desliers leurs subiects du serment de fidelité: Mais sur l'heure telles propositions (comme schismatiques) ont esté condamnées par le corps de Sorbone, authorisé de toute l'Eglise Gallicane, & par les Arrests de vostre Parlement, qui ont esté les deux grands bouchiers de vos predecesseurs contre les entreprises

qu'on a voulu faire.

IL se trouue d'ordinaire (comme à present) de tresbons Papes, & fort enclins à fauoriser la France, en souuenance des grandes obligations qu'à le saint Siege à vostre couronne, SIRE: Mais il s'en eslit aussi quelquefois qui panchét du tout du costé d'Espagne.

QUAND ce malheur aduient, si les François croioient que leur Roy peust estre legitimement excommunié, & eux deliurez du serment de fidelité, la verité est, que nos Rois courroient grãde fortune de se voir despoüillez de leur Estat: & en effect, ils n'auroient plus qu'un Empire preciaire, c'est à dire, qui dependroit de la bõne ou mauuaise grace de celui qui seroit esleu par messieurs les Cardinaux: entre lesquels y en a tousiours bon nombre qui tiennent de tresgrands benefices au Milanois, au Roiaume de Naples, & encores en Espagne. Cela ne seroit plus estre Roi, mais Viceroy: Roi de nom, & en effect Lieutenant general: tels qu'estoient ces Rois auxquels les Romains donnoient & ostoient les sceptres quand bon leur sembloit. Aussi tous ceux qui ont vescu depuis le Christianisme en ce Roiaume, ont reietté vne telle proposition, comme la plus dangereuse qui puisse estre mise dans les esprits du pëuple, & la plus contraire à la parolle de Dieu, qui a dict, *Mon regne n'est point de ce monde.* Surquoi S. Aug. 1. *Escoutez*

1. August.
tract. 115.

Audite Iudei
& Gentes,
audi prepu-
tium, audite
omnia regna

Iuifs & Gentils, escoutez tous regnes terriens, ie n'empesche point vostre domination en ce monde Et dans S. Luc 2. *Quelqu'un de la troupe lui dit?*

Maistre, di à mon frere qu'il face partage avec moy

terrena, non impedia dominationem vestram in hoc mundo.

2. S. Lucas 12. At quidam de turba, Magister dic fratri meo ut dūdat mecum hereditatem. At ille dicit ei: Homo quis me constituit indicem aut diuisorem super vos?

3. D. Bernard. lib. 1. de consid. Non monstrabunt puto qui hoc dicent, ubi aliquando quispiam Apostolorum sederit, index hominum, aut diuisor terminorum, aut distributor terrarum. Stetisse denique lego Apostolos indicandos, sedisse iudicantes non lego. Erit illud, non fuit.

moi de nostre succession. Et il lui respondit? Homme, qui est-ce qui m'a establi iuge ou partageur entre vous? Sur quoi S. Bernard 3. au liu. 1. de la consideration? Ceux qui disent cela, ne scauroient monstrier que iamais aucun des Apostres se soit assis comme iuge des hommes, ou partageur, ou distributeur des terres. Bref, nous lisons bien que les Apostres ont esté iugez par d'autres: mais qu'ils se soient assis pour iuger les autres, nous le lisons point. CELA SERA, MAIS IL N'A POINT ESTÉ.

SUR lesquelles raisons indubitables, & infinies autres que i'obmets pour abbreger, la Sorbone a tousiours decidé, & avec elle toute l'Eglise Gallicane; Que c'estoit vne proposition schismatique, que le Pape eust puissance d'excommunier nos Rois, ny de rien entreprendre sur leurs Majestez tres-Chrestiennes. Et Iean Tanquerel en l'an 1561. fut condamné par Arrest du Parlement, à faire amende honorable, & demander pardon au Roy, pour auoir osé mettre cette proposition en ses theses, encores qu'il declarast que ce n'auoit esté que par forme de dispute, & peu s'en fallut qu'il ne fust condamné à mort: bien luy prit que le Roy n'auoit qu'unze ans: s'il en eust eu seulement quatorze, il ne fust iamais eschappé.

L'A y dict que la Sorbonne auoit tousiours condamné cette proposition, ie l'entens iuſqu'à ce que les peres Ieſuites ont eu inſtruit pluſieurs eſcholiers aux leçons qu'ils faiſoient continuellement en Theologie. Car à la verité, en quatre vingts & neuf, lors que l'excommunication contre le feu Roy fut apportée, & qu'on propoſa en la Sorbone, ſçauoir ſi le Pape auoit ce pouuoir : Auſſi toſt les vieils Docteurs Faber Syndic, le Camus, Chabot, Faber Curé de S. Paul, Chauagnac, & tous les autres anciens & de la bonne paſte, y reſiſterent vertueuſement. Mais la partie eſtoit bien faiſte : car tous les ieunes qui auoient eſtudié en Theologie aux Ieſuites, Boucher, Pichenat, Varadier, Semelle, Cully, Aubour, & infinis autres, l'emporterent à la pluralité des voix, contre la parole de Dieu, & toutes les maximes de France.

A v s s i que ce ne ſoit l'opinion des Ieſuites, que le Pape peut excommunier les Rois, deliurer leurs ſubiets du ſerment de fidelité, & leur oſter leurs ſceptres, leurs couronnes & leur Eſtat, cela ne peut eſtre denié : veu qu'après que l'Vniuerſité de Paris leur eut obiecté cette dangereuſe doctrine, tant s'en faut qu'ils l'aient deniée, qu'au contraire en leurs deſenſes compoſées par l'aduiſ commun de toute leur ſociété, & à loiſir en l'an 1595. intitulées, *La verité defenduë contre le plaidoié d'Antoine Arnauld*, en la pag. 70. ils vſent de ces propres mots, *Tu n'auois que faire de prouuer que les Rois ſont ou doiuent eſtre ſeuls ſeigneurs temporels en leurs Roiaumes, veu que le Pape, comme i'ay*

dict, ne preteud rien en cette souueraineté, sauf à
radresser comme pere, VOIRE ENCORES
IVGE, ceux qui seroient pernicioeux à l'Eglise.
Car alors non seulement il peut, mais aussi il doit
se monstrier LEVR SVPERIEVR, pour leur
bien & celui du public. Ce sans te met en auertin
& te fait rechiner, si faut-il l'aualler, & confesser
au surplus, que tu n'as ni raison ni conscience. Car
premierement cela est vtile aux Princes, qui bien
souuent sont retenus, ou ramenez aux deuoirs, plu-
stost PAR LA CRAINTE DV TEMPO-
REL qu'ils aiment tousiours, encores qu'ils soient
mauuais, que du spirituel, duquel ils ne se soucient
s'ils n'ont bonne conscience, ce qui n'aduient pas
tousiours. C'est pourquoy Dieu menaçoit les Rois
d'Israël plustost de leur OSTER LEVR ROI-
AVME TEMPOREL, s'ils ne gardoient sa loi,
que de les priner de la vie eternelle: ET EN FIT
LA PRATIQUE AV FIN PREMIER, A
QVI IL OSTA LE SCEPTRE.

ET D'AVTANT, SIRE, qu'ils voient
que toutes les maximes de l'Eglise Gallicane,
& tous les Arrests de vostre Parlement, sont
directement contraires à cette doctrine si pe-
rilleuse, laquelle ils mettent petit à petit dans
les esprits du peuple qui en estoit ancienne-
ment si esloigné: ils sont contraints d'en ve-
nir-là, de dire que les histoires que nous ap-
portons de nos Rois, sont exemples de rebel-
lion, en ces mots: Tu es si mal sage & si mauuais
François, que de vouloir tirer des exemples DE
REBELLION des histoires de France, ternissant
la splendeur de nos Rois & de nostre mere com-
mune, &c. Et enuiron 2. pag. apres? En un Roi

Pag. 64.

65. & 66.

de la 1. im-

pression de

leurs defens.

conceues sous

le tilt, de la
verit, defend.
Et en la der-
niere impres-
sion de lettre
menue à la
pag. 49. 50.
51.

Pag. 51. de
l'impresion
menue, &
67. de la
grosse.

Baruc. 1.
S. Pierre ep.
1. c. 2.

S. Luc 22.

* S. Bern. au
lieu cité.

tout y est grand, soit vertu ou vice : & s'il emploie
sa puissance à mal faire, il ne peut estre arresté que
par une grand' puissance, Et partant voyons-nous
auoir esté prattiqué l'usage de ce glain en la per-
sonne de plusieurs Rois & plusieurs Royaumes : &
si la prattique n'a tousiours esté profitable, elle la
peu tousiours estre, Si LES SVBIECTS FVSSENT
ESTE BIEN DISPOSEZ. Il n'y eut iamais rien
plus clairement escrit, & n'y eut aussi iamais
rien au monde plus directement contraire à la
parole de Dieu qui veut que quand il nous en-
uoie de bons Rois, nous le remercions, quand
il nous en enuoie de mauuais, que nous l'en
louïons encores, & croions qu'il le fait pour
le mieux, afin que nous aimions moins le mô-
de, & que nous en sortions plus allegrement.
C'est Dieu seul qui establir les Rois, c'est luy
seul qui les peut oster en les tirant à luy, quand
bon luy semble. Les clefs qu'il a baillées à S.
Pierre & ses successeurs nos saintes Peres, ne
concernent que le Royaume des cieux, & nul-
lement ceux de la terre : luy mesmes qui pou-
uoit tout quand il a esté ici bas, nes'est point
meslé de chastier les Rois, ni de briser leurs
couronnes, au contraire toute sa vie n'a esté
qu'un liure ouuert d'humilité, & n'a donné à
ses Apostres autres armes pour establir sa loy :
il leur a dit, *Les Rois des nations les dominant, &
ceux qui usent d'autorité sur icelles sont appelez
bien-faicteurs, mais il ne sera pas ainsi de vous.*
Dieu n'a point voulu que S. Pierre ni ses suc-
cesseturs nos SS. Peres entreprinsent plus que
luy : * aussi les premiers ne l'ont pas faict. Si
d'autres y contreuient, ils abusent en cela

de leur pouuoir, & ne doiuent estre escoutez. L'Eglise Gallicane l'a tousiours ainsi iugé, & a excommunié ceux qui disoient le contraire, comme auteurs d'une fiere & tres-malheureuse doctrine, laquelle voulant rendre les hommes pies par impieté, cause tousiours un monde de meurtres, d'incendis, de rauissemens de femmes & de filles, & desolations de villes & prouinces entieres. C'est l'abyssine des abyssmes, & la mer des abominations: nous l'auons senti iusques à l'extremité, & neantmoins les Iesuites s'opiniaient de plus en plus: & si nous les croyons, les Bulles de Rome peuuent despoüiller tous les Rois de la terre, ET LEVR OSTER LEVR TEMPOREL, ET LEVR SCEPTRE.

A QUOI aussi est conforme ce que monsieur Bellarmin Iesuite, à present Cardinal, escrit sur ce subiect, *Quant aux personnes: Le Pape comme Pape, ne peut ordinairement deposer les Princes temporels (encores qu'il y ait iuste cause) en la façon qu'il depose les Euesques, c'est à dire comme iuge ordinaire: Et toutesfois il peut, comme souverain Prince spirituel, si cela est necessaire pour le salut des ames, CHANGER LES ROYAUMES, LES OSTER A L'VN LES DONNER A L'AVTRE, ainsi que nous le prouuerons.* Et au chap. 8. pour preuue il apporte toutes entreprises violentes directement opposees à la parole de Dieu, & detestees par toutes les histoires: la suite desquelles nous monstre que le grand establisement de l'Empire Mahometan vient des guerres intestines & furieuses entre les Chrestiens, engendrees par telles vsurpations, qui ont fait baigner l'Europe dans le sang de ses propres

*Itane immi-
nator est di-
gnitatis ser-
uus, si non
vult esse ma-
ior domino
suo: aut disci-
pulus si non
vult esse ma-
ior eo qui se
misit?*

*1. cantro. 3.
lib. 5. c. 6. p.
1081. de
l'impression
de l'an 1601.*

enfants, tant du costé de l'Orient, que de l'Occident. S. Ambroise se garda bien de penser seulement à toucher au sceptre, à la couronne, au temporel, ny à deliurer suiet quelconque du serment de fidelité. Comme aussi ne l'eust-il peu sans contreuenir directement aux commandemens de Dieu. Ce fut seulement vne admonition viuue, pour faire cognoistre vne tres-grande faute.

Belarmin 1.
controu. 3. li.
5 c. 7.
Et les Iesuites
pa. 42. de
menue Im-
pression de
leurs defenses
conceues sous
titre de veri-
té defendue.

ESTANT fort à remarquer, que le mesme sieur Belarmin & les mesmes Iesuites en leursdites defenses soustiennent & s'efforcent de confirmer l'Extravagante commune, *Vnam sanctam, de maiori tate & obedientia*, cōdamnee en France. Or par ceste Extravagante, si le Pape s'abuse, se desuoye, & entreprend plus qu'il ne doit, les hommes neantmoins sont tenus d'obeir, & Dieu seul le peut iuger. De sorte qu'encores qu'un Pape avec toute l'iniustice du monde fulminast vn Roi, comme nous l'auons veu pratiquer en 89. contre nostre deffunct maistre, tres-grand Catholique, neantmoins par la doctrine des Iesuites, personne du monde ne peut prendre cognoissance de cause : elle leur est interdite, & reservee à Dieu seul : Et cependant il faut que ce Roy, au veu de tous ses subiects, voire par eux-mesmes, soit despoüillé de son Estat & de sa Couronne, & qu'en sa place entre quiconque il plaist à cettere supreme puissance d'y establir, suiuiat ces mots dudit sieur Belarmin, *CHANGER LES ROYAUMES, LES OSTER A L'VN, ET LES DONNER A L'AUTRE*, qui sont les mesmes termes de Tanquerel, *Regno & dignitatibus priuare potest*,

condamnez par ce celebre Arrest. Et encores Tanquerel n'auoit pas esté si hardi, de dire que le Pape pouuoit donner à vn autre, ce qu'il auoit osté.

LE DIT sieur Belarmin Iesuite passé plus outre. Car il tranche net, que tous les Ecclesiastiques de vostre Royaume, ne sont plus vos subiects. Ce qui est aussi directement contraire à la parole expresse de Dieu, & au maximes del'Eglise Gallicane, que le surplus de ce qui a esté dit. Et neantmoins il se soustient hardi-

*Au traicté
De Exem-
ptione cleri-
corum, im-
primé avec
celuy des In-
dulgences.
1599.*

ment, & avec pures cauillations s'efforce de renuerfer ces paroles de S. Paul: *Que toute per-
sonne soit subiette aux puissances superieures: Car
il n'y a point de puissance sinon de par Dieu, & les
puissances qui sont en estat, sont ordonnées de Dieu,* Parquoy qui resiste à la puissance, resiste à l'ordonnance de Dieu. Et apres: *Partant il faut estre
subiets non seulement pour euitier leur ire, MAIS
AVSSI POUR LA CONSCIENCE. Car pour cet-
te mesme cause vous payez les tributs: d'autant
qu'iceux sont ministres de Dieu, s'emploians à ce-
la.* Sur quoy S. Iean Chrysostome remarque que ces paroles sont dictes non seulement pour les Laics, mais aussi pour les Clercs, pour les Religieux, voire pour les Apostres mesmes.

*Epist. ad
Rom. cap. 13.
S'ouïez-
vous.*

*Ἐμὸν νόμος
τὴν ὀργὴν
ἀλλὰ καὶ
τὴν
συνείδη-*

Et encores veut le mesme sieur Belarmin eluder ces paroles de S. Pierre: *Donques rendez
vous subiects à tout ordre humain, pour l'amour
de Dieu: soit au Roy, comme au plus esleué; soit
aux Gouverneurs, comme enuoiez de par luy.* Et entre autres choses, ledit sieur Belarmin dict: *En ce temps-là il estoit fort necessaire d'aduer-
tir
diligemment les Chrestiens qu'ils obeissent aux*

*Epist. 1. c. 2.
ὑποτάγη-
τε τῷ πα-
τρὶ καὶ
τοῖς ἀν-
θρώποις
κατὰ
τοῦ
κυρίου.*

Rois, de peur que la Predication de la foi ne fust empeschée. Ce qui seroit faire de nostre Religion Chrestienne vne Religion de pipeurs, vne Religion de Renars qui au commencement vinssent dire: Nostre regne n'est point de ce monde, nous obeissons tous, & Ecclesiastiques & autres, aux Rois, aux Gouverneurs: Et puis quand ils seroient au dessus du vent, & qu'ils auroient eniambé l'auctorité, qui vinssent alors tenir vn langage tout contraire, & s'attribuer arrogamment ce que Dieu tout-puissant s'est reserué à luy seul, sur les Rois d'Israël & tous autres. Voila à la verité, la vraie doctrine Iesuïte? voila leurs ruses, voila le chemin qu'ils tiennent pour s'insinuer dans les Estats: mais c'est toute autre chose de la Religion Chrestienne, laquelle parle tousiours franchement, veritablement, sans deguïsement, sans fard, sans feintise: & ne distraict ni enleue subiect quelconque à son Prince, ainsi que fait la doctrine Iesuïte. Car en fin, voici la conclusion dudit sieur Belarmin, en la page 271. de ce mesme traicté des exemptions: Mais tu diras, Ce seroit faire tort aux Princes, si contre leur gré ils estoient prinex de leur droit qu'ils auoient sur les clerics auant qu'ils eussent pris clericature. A quoy ie respons, qu'on ne leur fait aucun tort, d'autant que celui qui use de son droit, ne fait tort à personne. Or celui-la use de son droit, qui choisit l'estat qu'il estime luy estre le plus conuenable, COMBIEN QUE PAR ACCIDENT IL S'ENS VIVE QUE LE PRINCE SOIT PRIVE' DE SON SVBIECT. Ce n'est point marchander, c'est le trâcher court,

& dire à vostre Majesté en vn mot; Qu'autant qu'il y a d'Ecclesiastiques en France, autant il y a de subiects du Pape. Et de faict, en la page 255. il vsc de ces mots; *Le Pape a osté tous les Ecclesiastiques de la subiection de leurs Princes seculiers: dont il s'ensuit qu'en ce qui concerne les personnes Ecclesiastiques, ils ne sont point Princes souverains, &c.* Qui est, en bon François, bastir vn autre Estat dans vostre Estat, SIRE, & vn autre Roiaume dans vostre Roiaume. Et de faict, pour prouuer ceste doctrine, qui est directement opposee à la foi Chrestienne, en ce mesme endroit il faict vn argument à simili, Page 255. & dit que c'est tout ainsi que si vn Roi assubiectionnoit à vn autre, vne partie de son Roiaume, & en ce faisant, par le droit de guerre, ou par autre iuste titre, perdrait partie de son Estat. Et dit fort vrai, quel'establissement de sa maxime est plus dangereuse pour les Princes, que la perte d'vne grande iournee, ou d'vne grande Prouince. Car le mal est dās les entrailles, & ceux qui sont desia perdus, attirent souvent les autres par leurs confessions secretes, à renuerſer la Monarchie sous laquelle ils sont nais. Que s'ils sont contraincts quelquefois de recognoistre les Magistrats, ils dient que c'est par force, qu'il faut caler voile, mais que cela ne fait consequence: ce que nous deuons bien remarquer. Et disent en outre, que les ordonnances des Rois, encores qu'il n'y ait rien de contraire à l'Eſcriture, ni aux Canōs & ſaincts Decrets, neantmoins n'obligent les gens d'Eglise que *ad directionem, non ad coactionem*. Ce sont leurs propres mots en la page 269. qui est

Page 258. dis-
dit traité de
exemption,

ce qu'ils dient apres, page 271. que les clerics ne sont plus subiets du Prince temporel, & qu'il les perd. Côme à la verité il est bien sans doute, que celui-là n'est plus subiect, qui ne peut plus estre contrainct d'obeir aux loix.

Ces heresies auoient esté autrefois du tout deracinees de vostre France, SIRE, mais en voici qui les viennent resemer abondamment, & ont eu l'artifice de faire glisser ce traicté parmi celui des Indulgences, ils l'ont fourré dans la presse, afin qu'on n'y prist point garde. Or de ceste proposition, que les Ecclesiastiques ne sont plus subiets, voici vne merueilleuse consequence, c'est qu'ils pourroient entreprendre contre leur Roi, sans crime de leize Majesté. Et voici cette consequence couchee en termes precis dans les aphorismes des cōfesseurs, composez par le Iesuïte Emanuel Sa, sur le mot *Clericus*. *La rebellion d'un clerc contre le Roi, n'est pas crime de leize Majesté, d'autant qu'il n'est plus subiect du Roi.*

*Impression
d'Anvers ou
de Cologne.
Clerici rebel-
lio in regem,
non est crimē
lese Maiesta-
tis qui a non
est subditus
regi.*

*S. Pierre
Epist. 1. c. 2.
Rex potest per
Rom. priua-
ri ob tyranni-
dem, Et si nō
faciat officiū
suum & cum
est causa ali-
qua iusta &
eligi alius à
maiori parte
populi
Quidam ta-
men solum ty-
rannidē cau-
sam putant.*

Et sur le mot *Princeps*, ils font encores plus clairement cognoistre combien ils sont contraires à la parole de Dieu, qui veut qu'on supporte les mauuais Princes establis dans le thron de leurs ancestres, comme estans donnez de sa main. Car voici comme ils en parlent, *Un Roi peut estre priné par la Republique, à cause de Tyrannie, & s'il ne fait son deuoir, & quand il y a quelque autre cause iuste, & un autre Roi peut estre esleu par la plus grande partie du peuple. Quelques-uns neantmoins pensent que la tyrannie est seule cause suffisante.*

PREMIEREMENT on voit la malice de

laisser en incertitude vne chose de tel poids. Dieu sçait s'ils le font à cautelle, afin de pou-
 uoir estre d'un aduis ou d'autre, selon leurs des-
 sirs & leurs desseins. En second lieu, qu'y a-il
 plus contraire à la foi Chrestienne, que de
 laisser en la liberté du peuple, de iuger du bon
 ou du mauuais gouuernement de son Prince,
 & de lui faire croire qu'en saine conscience, &
 selon Dieu, il peut le chasser ou massacrer?
 pourueu qu'ils soyent la plus grande partie de
 cet aduis. Qui est vne condition bien neces-
 saire: car s'ils estoient le moindre nombre de
 cette furieuse opinion, ils seroient en danger
 de mourir en la peine: qui seroit dommage de
 perdre des gens **SI BIEN DISPOSEZ A**
LA DOCTRINE DES IESVITES, c'est
 à dire, à chasser leur Maistre & leur Seigneur
 de son heritage, en criant au Tyran. C'est
 pourquoi tout à la fin de celiure, l'Inquisiteur
 d'Anuers *Pardo* en l'an 1597. dict qu'il appor-
 tera vne grande vtilité. Et Dieu sçait si plus
 grande vtilité il estimoit qu'il peust apporter à
 son maistre, que d'aider à la dissipation de vo-
 stre Couronne, avec laquelle il auoit lors la
 guerre à feu & à sang. Voici ce que les mesmes
 Iesuites en ces aphorismes des Confesseurs,
 qu'ils inculquent continuellement en l'esprit
 du peuple, adioustent sur le mot *Tyrannus*.
Celui qui gouuerne tyranniquement vn Estat. **IV-**
STEMENT ACQUIS, n'en peut estre desponil-
lé, SANS VN IUGEMENT PVBLIC:
MAIS QVAND LA SENTENCE EST
DONNEE, LE PREMIER VENV PEVT

*Tyrannicè gu-
 bernans iuste
 acquisitum
 dominium,
 non potest spo-
 liari sine pu-
 blico iudicio:
 lata vero sen-
 tentia potest
 quisque fieri
 executor. po-
 test autem de-*

*poni à populo
etiam qui in-
rauit et obe-
dientiam per-
petuam, si mo-
nitus vō vult
corrigi.*

ESTRE EXECVTEVR. *Que si aduerti, il
ne se corrige,* IL PEVT ESTRE DEPOSE
PAR SON PEUPLE, ENCORE QV' IL
LVI EVST FAICT SERMENT DE FI-
DELITE PERPETVELLE.

OR SI toute cette doctrine vous regarde de
prés, SIRE, c'est à vostre Majesté à le iuger:
ellen n'importe pas tant à tout le monde ense-
mble, qu'à vous seul & à vostre posterité. La Frâ-
ce est vostre heritage, que vous tenez de Dieu
seul & de vostre bonne espee. Si le monde du-
roit encores dix mil ans, & que vostre poster-
ité durast autant (comme nous le deuons espe-
rer) elle doit par raison tousiours regner sur les
François, sans que les Papes, qui se pourroient
rencontrer quelquefois ennemis de vostre
maison, ayent puissance de deslier vn seul Frâ-
çois de la fidelité qu'ils deuront à vostre li-
gnee. Mais si ces maximes se coulent parmi
nous, vostre posterité, SIRE, portera sa
Couronne, & tiendra son Sceptre aussi long
temps qu'il plaira au S. Siege, & non plus.

DE cette premiere maxime depend la se-
conde, sur laquelle ie voi tant d'escrits de part
& d'autre, & nul ne vient à poinct. Quelques-
vns dient, que les Iesuites conseillent de tuer
les Rois, cela n'est pas: ils les seruent, au con-
traire, & souuent d'affection: mais voici la
distinction. Ils croyent que ceux qui sont ex-
communiez par le Pape, ne sont plus Rois,
ains Tyrans, vous auez oui ce qu'ils en dient
sur le mot *Tyrannus*. Et de faict, si on demeure
d'accord de la premiere proposition, la secon-

de s'en suit: Car si le Pape peut mettre la main sur le SCEPTRE des Rois & sur leur temporel, ainsi que disent les Iesuites: il reste, sans difficulté, que quand sa Sainteté fulmine vn Roy, il demeure priué, il demeure particulier, il n'est plus Roy, & s'il continuë de vouloir regner, il est tyran. Quiconque demeurera d'accord de la premiere proposition, sera par force trainé à la derniere. Aussi le liuret escrit de la propre main de Jean Guignard Iesuite, & qu'il recognut en plain Parlement, les deux Chambres assemblees, portoit ces deux mesmes propositions outrageusement escrites: Car entre autres choses il y auoit: *Que le Neron cruel a esté tué par vn Clement, & le moine simulé depeché par la main d'un vrai moine* *Que L'ACTE HEROIQUE FAIT PAR IACQUES CLEMENT, COMME DON DV S. ESPRIT, APPELLE DE CE NOM PAR NOS THEOLOGIENS, a esté iustement loué par le feu Prieur des Iacobins Bourgoing, Confesseur & Martyr, QUE LA COVRONNE DE FRANCE POVVOIT ESTRE TRANSFEREE EN VNE AVTRE FAMILLE QUE CELLE DE BOVRBON: Que le Biarnoïs ORES QUE CONVERTI A LA FOY CATHOLIQUE, seroit traicté plus doucement qu'il ne meritoit, si on luy donnoit la couronne monachale en quelque Conuent bien reformé, pour illec faire penitence de tant de maux qu'il a faicts à la France, & remercier Dieu de ce qu'il luy auoit fait la grace de se recognoistre auant la mort. QUE SI ON NE LE PEUT DEPOSER SANS GVERRE, QV'ON GVERROYE, SI ON NE PEUT FAIRE LA GVERRE QV'ON LE FACE MOVRIR. Vostre Majesté*

peut voir l'original, ceci le merite bien.

D'auantage, Ambroise Varades estoit Principal de leur College à Paris, par eux choisi, comme vn des plus gens de bien de leur ordre & est encores parmi eux en aussi grand honneur qu'il fut iamais. Et neantmoins, s'il plaist à vostre Majesté de se faire apporter le procès de Barriere, vous y lirez que ce fut Varades qui le mois d'apres l'heureuse conuersion de vostre Majesté, l'encouragea de vous aller fourrer son cousteau tranchant des deux costez, dans le ventre, & l'y obligea avec le Sacrement de l'Eucharistie, l'assurant par le Dieu viuant, qu'il ne pouuoit faire vn acte plus meritoire, & que les Anges le porteroient en Paradis. Si cela n'est veritable, Varades s'en doit iustifier: il fut quelques iours caché en ceste ville lors que vostre Majesté y entra, & puis sortit deguisé, & s'en alla à Rome, où il est honoré entre eux tout ce qui se peut. Il est bien aisé de desaduouier de bouche, mais les actions sont les plus fortes, & dementent les paroles. Varades ayant commis cet horrible & execrable forfait, vous seroit mené lié par les Iesuites, pour en faire vne punition tref-exemplaire, s'ils estoient d'autre aduis que luy. Puis qu'au contraire vous voyez qu'ils l'honorent plus que iamais, & qu'encores ils sont si hardis de le mettre entre les plus grands personnages de leur ordre, il s'ensuit que de souhait, de volenté, & d'affection, ils ont tous encouragé Barriere par l'organe de Varades, leur Principal, & que ce n'est point vn parricide particulier, mais general. Aussi est-il fondé sur leur gran-

de maxime, & de l'exécution & pratique de laquelle ils attendent le plus de louange ainsi qu'il sera dit.

MAIS où est cela qu'ils mettent encores à present Varades entre les grands personnages de leur société? Le voici en la pag. 265. de leur dite prétendue Verité defendue, imprimée vn an apres la fuite de Varades. *Que n'ont enduré plusieurs GRANDS PERSONNAGES de cette Compagnie? qui ne sçait, pour parler de nostre France, les affronts qui ont esté faits les calomnies qui ont esté dites contre Iean Maldonat, Emond Auger CLAUDE MATTHIEU, Jacques Tyrinus: & maintenant contre Annibal Codret, JACQUES COMMOLET, BERNARD ROILLET AMBROISE VARADE.* Estant bon, de remarquer que ce sont là de grands martyrs, & qui ont beaucoup enduré. C'est parler aussi proprement & aussi Chrestienement, que quand ils appellent persecution terrible, leur procez de 64. à Paris, qui est merueilleusement abuser de ce mot. Mais bien sera-ce parler fort proprement, si on appelle persecution de tous les bons François, les furieuses & funestes guerres que les Iesuites ont excité par tout ce Royaume.

QUE SI Barriere eust esté escholier des Iesuites, nourri & esleué en leur doctrine, difficilement eust-il accusé Varade: car ils croient damnez ceux qui descouurent à la Iustice les exhortateurs de telles entreprises. Et cette troisieme proposition s'ensuit encores de la premiere & de la seconde. Car si le Pape peut

En l'impression en menue lettre. c'est la page 198.

pag. 69. en menue lettre.

excommunier les Rois, & que ce soit bien meritoirement faict de les tuer apres la fulmination, il s'ensuit aussi qu'il faut endurer le martyre constamment, & n'estre pas cause de la mort de ceux qui ont conseillé le chemin de la vie eternelle. Ces propositions sont enchaînées, & s'en vont de mesme pied.

C'EST pourquoy Chastel ne voulut en particulier accuser aucun des Iesuites, puis que croiant bien faire, ainsi qu'il le declara, il auoit resolu de vous donner de son cousteau dans la gorge: dont il s'ensuit qu'il eust creu se damner, s'il eust nommé celuy qui luy auoit montré la voie de Paradis, selon son iugement peruersti. Et neantmoins comme Dieu protecteur des Rois, tire la verité de la bouche de ceux qui la veulent le plus celer: voici les propres mots de l'interrogatoire de Chastel, d'ôt vostre Majesté peut voir l'original, qui vous sera tesmoigné tres-veritable, par plus de trente de Messieurs les Presidens ou Conseillers, plus croiables mille fois que tout ce que scauroient dire les parties en leur propre cause. *Enquis oï il auoit appris cette Theologie nouuelle, A dict que c'estoit par la Philosophie. Interrogé s'il auoit estudié en Philosophie au College des Iesuites, A dict qu'ouy, & ce sous le pere Gueret avec lequel il auoit esté deux ans & demi. Enquis s'il n'auoit pas esté en la Chambre des Meditations, où les Iesuites introduisoient les plus grands pecheurs, qui voyoient en icelle Chambre les pourtraicts de plusieurs diables de diuerses figures espouuentables souz couleur de les reduire en vne meilleure vie pour esbranler leurs esprits, & les pousser*

pousser par telles admonitions à faire quelque grand cas, à dit qu'il auoit esté souuent en ceste chābre des Meditations. Enquis par qui il auoit esté persuadé à tuer le Roy, A dict auoir entendu en plusieurs lieux, qu'il falloit tenir pour maxime veritable, qu'il estoit loisible de tuer le Roi, & que ceux qui le disoient, l'appelloient Tyran. Enquis si les propos de tuer le Roi, n'estoient pas ordinaires aux Iesuites: A dict leur auoir ouy dire qu'il estoit loisible de tuer le Roy, et qu'il estoit hors de l'Eglise, & ne luy falloit obeir, ny le tenir pour Roy, iusques à ce qu'il fust approuué par le Pape. Derechef interrogé en la grand Chambre, Messieurs les Presidens & Conseillers d'icelle & de la Tournelle assemblez, il a faict les mesmes responses, & signamment a proposé & soustenu la maxime, Qu'il estoit loisible de tuer les Rois, mesmement le Roy regnant, lequel n'estoit en l'Eglise, ainsi qu'il disoit, parce qu'il n'estoit approuué par le Pape.

Quiconque lira les Requestes que les Iesuites vous ont presentees, SIRE, estimera que Chastel ne les a point accusez, tant ils denient hardiment la verité. Mais ie ne sçai pas quelle plus grande accusation se peut trouuer, quelle plus grande charge se peut imaginer, que d'effasciner les esprits encores tendres de la ieu nesse, d'vne si furieuse doctrine, qui les porte à massacrer leur Prince.

A quoi est conforme ce que nous lisons de la deposition de Guillaume Parri faite à sa mort, que Benedicto Palmio Iesuite luy auoit faict prendre la resolution de l'assassinat, & qu'en ayant communiqué avec vn Prestre

nommé Vates, il la lui desconseilla, disant qu'il seroit damné : & que voiant ceste contrariété, il alla à confesse à Annibal Codrero Iesuite, qui luy dit qu'il falloit necessairement que ce Vates fust heretique : d'autant que la vraye Eglise ne doutoit point que les Rois excommuniez par le Pape fussent tyrans, & partant ne deussent estre tuez. Aussi le commentaire du liure appelé Sommaire des Constitutions, autrement septiesme des Decretales, en la page 308. après auoir exalté les Iesuites tout ce qui se peut (comme à la verité ils ont de bonnes parties) en fin pour comblé de leur louange, dit d'eux, *Tyrannos aggrediuntur, locum ab agro Dominico euellunt*. Vostre Majesté peut prédre le liure en main, elle entédra bien ce latin là, ie luy en ay ouy interpreter de plus difficile. En fin, que cela ne signifie qu'ils scauent fort bien & courageusement arracher l'iuroye du champ du Seigneur, & se deffaire de ceux qui sont excommuniez à Rome, il n'y a point de doute: ils les appellent tous tyrans, de quelque religion qu'ils soient.

Et de faict, le feu Roy ne fut iamais que tres-grand Catholique: chacun le scait assez, & les obligations particulieres que l'Eglise lui auoit neantmoins aussi tost qu'il fut excommunié à Rome, pere Commolet, pere Bernard (qu'ils exaltent encores iusques au ciel par leurs defenses ci dessus rapportees) & generalement tous les autres Iesuites ne l'appelerent iamais depuis iusques a sa mort, que Tyran, Holofernes, Moab, Neron. Ce qui est conforme à leur definition de tyran cy dessus rapportee.

A Noel 93. vostre Majesté estoit Catholique, & neantmoins dans S. Barthelemi ce mesme Commelet dit, *Il nous faut vn Aod, fust-il Moine, fust-il soldat, fust-il berger, il n'importe de rien : mais il nous faut vn Aod.* Et depuis, estant aduertri qu'on en informoit, il s'en uada. Cela ne se peut denier, non plus que le faict de Varades, qu'ils veulent desguiser, disant qu'à la verité Barriere luy descourrit son dessein, & qu'il luy fit response qu'il ne luy en pouuoit donner conseil, estant Prestre. Quand il n'y auroit que cela, qu'est-ce autre chose en effect, sinon luy dire: Tule deuois faire, sans en parler d'auantage : fais en plus & dis en moins? Mais si vostre Majesté se faict apporter le procès verbal de mort de Barriere, elle trouuera que Varades, Principal des Iesuites, l'exhotta, l'anima, & l'obligea par le saint Sacrement de l'Autel, à frapper le coup promptement & courageusement. Et certes vostre Majesté ne courut iamais plus grande fortune en sa vie. Et Dieu sçait s'ils eussent fait des miracles de vostre mort, puis qu'ils en auoient si bien faict de celle du feu Roy, insultant superbement sur son tombeau, par lettres enuoyées en tous endroiets du monde, & qu'ils ont encores faict imprimer à Rome, pour plus grande brauade. Elles sont inscrites dans leurs lettres solemnelles & annales, en la page 305. dont voici la version, *Le mesme iour que le Roy nous faisoit chasser de Bordeaux, il fut chassé de la vie. On dit qu'il nous auoit fait mener à Saint Macaire pour nous faire esgorger là tous, s'il rat,*

*Quo die nos
Regis edicto
Burdgala
pellel a nur,
eo die Rex ip-
se qui edixe-*

pnisus est .
At eo cōpin-
gebamur ad
R. Macha-
rū, vt simul
opprimere-
mur omnes
(sine hoc sus-
pitio, seu fa-
ma tulit)
nisi antea op-
pressus ille u-
nus fuisset,
hoc porro nū-
triatum cum
esset, affli-
xit animos
aduersario-
rum,

esté esgorgé le premier. Quand ceste nouuelle fut
venue nos ennemis se trouuerent merueilleusement
estonnez. Je ne fus iamais si esbahi, que quand
 ie leu cest endroict de leurs lettres. Et à la ve-
 rité, qui eust pensé que des Religieux, ny mes-
 mes des Chrestiens eussent voulu monstrier
 vne telle rage & inimitié si irreconciliable,
 voire apres la mort? La Nature nous ensei-
 gne d'auoir pitié & commiseration de nos
 ennemis, quand nous les voyons estendus
 par terre: Ils ne peuuent plus estre nos enne-
 mis, puis qu'ils ne sont plus. Mais de mettre
 les pieds sur le ventre de son Maistre, de son
 Seigneur, de son Roy, & du premier Roy de
 la Chrestienté, & là dessus chanter triomphe,
 c'est surpasser toutes les barbaries, toutes les
 inhumanitez, toutes les cruauitez qui se peu-
 vent imaginer.

Il est vray, que le pauvre Prince n'a point
 senti cet outrage: aussi n'est-il pas tant faict à
 luy, qu'à vostre Majesté, SIRE, & à tous ceux
 qui portent le nom de François. Mais bien
 a-il senti asprement le poison de la Ligue, qui
 luy fut préparé par Claude Matthieu Iesuite,
 qui mourut en Italie à la fin de 88. du trauail
 des voyages qu'il auoit faits cōtinuellemēt en
 Espagne, en Italie, en Suisse, en Allemagne, en
 Flādres, depuis le deceds de feu Mōsieur: pour
 conclure, noüier, & fortifier cette grāde & hor-
 rible conspiration contre le feu Roi & toute
 la maison de Bourbon. Vostre Majesté voit
 ce que Guignard Iesuite en auoit escript:
Que la Couronne de France pouuoit & deuoit es-

tre transferee à une autre famille que celle de Bourbon. Aussi ceux qui sçauent le secret de la Ligue, disent tout haut, que les peres Iesuites ont esté les vrais peres de la Ligue, & qu'ils sont coupables & responsables de la mort de tous ceux qui sont tombés dans ce grand abisme par eux ouuert.

V O I C I vne petite histoire qui le confirme bien clairement. On sçait quel estoit le dessein des Seize, qui par vne lettre intercepte donnoient la ville de Paris au Roi d'Espagne. Où choisirent-ils vn President de leur conseil sanglant? Ils s'en allerent droit aux Iesuites, qui leur baillerent pere Odo Pichenat. Ils le confessent par leurs defenses imprimees à Paris, mais ils disent que c'estoit pour adoucir l'humeur des Seize. Il y en a qui respondroient, que c'est ietter l'huile dans le feu, que de mettre vn Iesuite parmi des seditieux. Pour moi ie dis autrement, sçauoir que les Seize n'auoient besoin que de frein, & non d'esperon; & que le seul moien de faire reüssir leur malheureux dessein, estoit de moderer leur trop grande violence. Mais qui ne voit vne correspondance merueilleuse de ces Seize bourreaux (autrement ne les peut-on appeller, puis qu'ils ont pendu eux-mesmes le seul President du Parlement qui restoit à Paris?) qui ne voit dis-ie, vne merueilleuse correspondance des Seize avec cette societé des Iesuites, puis qu'ils vouloient estre presidez par l'vn d'eux, plustost que par aucun autre Ecclesiastique ou Lai?

A V S S I que depuis le commencement de

85, leurs maisons & à Paris, & par tout ailleurs, n'aient serui de rendez-vous à tous ceux qui ont procuré l'aduancement des affaires d'Espagne: que les pacquets n'y ayent esté portez, ouuerts, distribuez: qu'ils n'eussent communication ordinaire avec l'Ambassadeur Mendosse, & ses successeurs à Paris, & avec les agens & entremetteurs des affaires du Roi Philippes en toutes les bonnes villes où ils estoient, cela est trop notoire. Qui le sçait mieux que vostre Majesté?

Il est vrai, SIRE, qu'ils dient que vous estes aujourd'hui si estroittement conioint avec le Roi d'Espagne, que cela leur doit plustost seruir que nuire: d'autant que vostre Majesté n'affectionne rien d'auantage que ceux qui aiment cordialement l'Espagnol.

CELA se peut parauanture dire maintenant: mais à la verité, ie trouuai bien estrange, comment ils vsoient des mots que voici lors que nous estions au plus fort de la guerre contre le Roi Philippes, *Car du temps de Charles ix. on ne parloit point des Espagnols qu'en fort bonne part: mais les heretiques, non en haine de la nation (car les Anglois, ou Allemands leur doiuent estre plus ennemis, ayans plus fait de mal à la France qu'autre nation) ains de la religion, ont tasché de les rendre odieux, sous couleur de l'Estat. Il me semble que c'estoit vn peu trop descourir son affection enuers les Espagnols en vn temps auquel ils massacroient les François à milliers sur la frontiere de Picardie. Encores ne se faut-il pas tant laisser emporter à vne affection & vœu commun de sa reigle, qu'on ne*

*Pag. 159. de
leursdites de-
fenses sous le
tiltre de veri-
té defendue, en
grosse lettre:
& page 119.
en menue.*

se souuienne de sa naissance, & qu'on ne res-
sente quelque peu de la douleur & des miseres
de son païs : veu mesmement que c'estoyent
Catholiques qu'on esgorgeoit, de tous âges,
de tous sexes, en grand nombre, & sans aucu-
ne misericorde. C'est (ce me semble) auoir le
cœur bien dur, de parler en cette façon, de
ceux qui se baignoient au mesme temps dans
le sang des François & Catholiques. Siles Es-
pagnols portent plus de respect, d'honneur,
de reuerence : s'ils font de plus grands biens &
gratifications aux peres Iesuites : s'ils les appel-
lent Apostres, comme eux-mesmes l'escriuent,
si ne faut-il pas pour cela, parler d'eux en Fran-
ce en temps de guerre, comme en temps de
paix.

P A R la requeste qu'ils ont depuis presen-
tee à vostre Maiesté, ils se sont estendus sur ce
subiect avec librté, & avec plus de raison, en
ces termes, *Ce qu'ils nous mettoient sus, que nous
estions Espagnols, estoit vn crime battu à la for-
ge du temps, qui estoit de bonne trampe en sa sai-
son, seulement pour le regard de la saison, c'est à
dire, quand la guerre estoit entre la France &
l'Espagne, alors c'estoit vn nom odieux, vn nom
de soupçon & de haine : maintenant que vostre
Maiesté Tres-Chrestienne a serré le nœud d'une
sainte paix avec la Maiesté Catholique, & que
le François est frere à l'Espagnol, & l'Espagnol
au François, ce crime est suranné, hors de saison,
& sans raison.*

E T neantmoins si faut-il que ie vous con-
fesse, S I R E, qu'il me semble qu'outre ce que
nous en sçauôs desia trop, ces gens ici par tous

ces beaux langages, se monstrent merueilleusement engagez avec le Roi d'Espagne. Ils desfirent fort de vous leuer tous soupçons, & y trauaillent avec vn artifice exquis: mais si est-ce qu'on voit bien que sur tout ils ne veulent point que vos subiects cognoissent qu'ils soient autres que tres-affectionnez du Roi Philippes, estimans que cela importe au bien de ses affaires. Ce que quand ie conioins avec l'Arrest de l'Inquisition qui cassa le decret de la Sorbone faiët contr'eux en 64. ainsi qu'eux mesmes s'en vantent, & avec leur premiere fondation faite par vn Capitaine Espagnol, & encores avec ces mots qui sont en la vie d'Ignace, page 169. *Nous deuons prier & reprier Dieu nuict & iour, qu'il conserue fort long temps en toute santé & toute prosperité, le Roi Catholique Philippes: lequel par son hereditaire & excellente pieté & deuotion, prudence singuliere, vigilance incroiable, (& puissance infiniment plus grande que n'eut iamais Roi au monde, sert de rāpart pour la defense de la religion Catholique.)* Ce qu'il fait non seulement par ses armes, *Qui ont tousiours esté inuincibles, mais aussi par le moien de ce grand Senat de l'Inquisition, qui veille continuellement pour la Religion Catholique.* Quand ie conioins tout cela ensemble, il faut que ie vous recognoisse, SIRE, que si quelque malheur vous apportoit la guerre, i'apprehenderois fort que ces gens ici secrettement vous fissent en toutes façons de tres-mauuais offices. Et si en autre temps ils ne demeurent pas inutiles. Car ils aduancent tousiours la propagation de leur doctrine ci-dessus remarquee: à laquelle

laquelle ils firent cognoistre en 89. qu'ils auoient desia beaucoup trauaillé & faict de grands progresz. Car si contre le Roy Henry I. l. fust venu vne pareille excommunication, elle n'eust pas eu pouuoir de faire seulement branler la moindre ville du Roiaume: mais par le moyen des peres Iesuites, & leur trauail d'environ trente annees, elle a causé la mort du fils de celuy qui ne s'en fust fait que rire, non plus que ses predecesseurs. C'est chose estrange, qu'une armee de deux cens mil hommes n'eust peu faire contre le defunct Roy ce qu'environ deux cens Iesuites ont fait, EN DISPOSANT SES SVBIECTS: c'est à dire, en alterant tellement les esprits, que le feu s'y est pris du premier coup: Au lieu qu'auparauant la France estoit vne grande mer, dans laquelle ce tonnerre estoit aussi tost esteint que tombé.

OR à la verité, tant que vostre Maiesté & les vostres serez bien auec les Papes, le grand effect de ceste doctrine ne se manifestera pas: & vous deuez esperer d'y estre tousiours bien, mais l'aduenir est incertain. C'est pourquoy en temps de paix vous faites diligemment trauailler aux frontieres. Et il est bien difficile que le S. Siege se garantisse trois fois de rang de tomber entre les mains d'un partisan d'Espagne, tant il y en a grand nombre entre Messieurs les Cardinaux: Lors il faut que ie vous parle franchement, SIRE, & sans vous flatter. La verité est, que vostre Couronne, vostre Sceptre, vostre Regne dependoit de ce seul mot, s'il y auroit plus de vos subiects de l'opi-

nion des Iesuites, que de la contraire: si la leur preualoit, vous ne feriez plus rien: si elle estoit la plus foible, vous demeureriez le maistre: mais encore seroit-ce tousiours avec le sang & la ruine de beaucoup de vos subiects, bons & mauuais.

Et sur ce poinct vostre Maiesté peut considerer, que cette doctrine de l'excommunication nous est maintenant beaucoup plus perilleuse, que lors que nous auions des Estats & des armées en Italie: par le moien dequoi nous pouuions secourir vn Pape qu'on eust voulu forcer à faire quelque chose contre nous. Mais auourd'huy vn Viceroy de Naples, avec les partisans d'Espagne dans Rome, tiennent le pied sur la gorge des SS. Peres, qui seroyent trois fois assiegez & pris deuant que nous fussions à mi-chemin pour les secourir. Ioint que Rome n'a iamais vescu que du bled de Sicile, son grenier.

Sur tout ce que dessus est besoin de remarquer, que les Iesuites recognoissans combien cette doctrine est perilleuse pour les Princes, se gardent bien de la descouurir lors qu'ils commencent à s'insinuer & glisser dans les Estats: mais quand ils y ont pris pied ferme, alors ils la font couler petit à petit de l'un en l'autre parmi le peuple qui n'est naturellement que trop susceptible de ce poison. Car que peut-il y auoir plus doux en beaucoup d'esprits, que d'estre desliés de la subiection à laquelle leur naissance les oblige? Je sçai bien que les habiles hommes sçauent ce beau mor d'un Philosophe; Que d'obeir à son Roy, est la vraye &

la grande liberté, Que le droit de Nature & celui des gens nous enseignent & nous obligent de seruir & honorer le Prince sous l'Empire duquel nous auons premierement veu le Soleil, & que nul homme de dessus la terre ne nous peut dispenser de l'obeissance à laquelle Dieu nous a obligez. Mais pour vn esprit bien composé qui sera de cet aduis, il s'en trouuera trois d'autre opinion : & le mal est, qu'ordinairement les plus audacieux, hardis & entreprenans tomberont en ce precipice : & si, souuent vn petit nombre de ces gens reuiuans se rendrôt plus forts qu'une multitude d'autres. Ne l'auons nous pas experimenté ? Le croi fermement que lors qu'on commença à appeler le feu Roi, Tyran, dans Paris, en disant qu'il estoit excommunié par le Pape, & qu'il le falloit exterminer, il y en auoit deux fois plus qui croyoient le contraire, & qui l'eussent voulu voir bien paisible regner dans le Louure, & vne douzaine de ces mutins à la Greue : mais on s'entre-regardoit, le courage manquoit, & non la force. Ainsi dix marchans seront souuent destrouffez par trois voleurs, qui les surprendront. Ceux qui demeurent dans le grand chemin, & dans l'obeissance naturelle, dorment la nuit, & s'occupent le iour à leurs affaires particulieres : Au contraire, ceux qui veulent changer de maistre, & renuerser l'Estat, s'assemblent de nuit, conspirent, se fortifient chacun iour, ils n'ont que cela à faire, ils vivent de leurs pensions secretes, & en fin oppriment les autres à l'improuiste. Qui met le premier la main aux armes, à l'aduantage.

LES Iesuites donc tenans fermement ces dangereuses maximes, & les semans par tout le monde, comme il a esté monstré ci-dessus, certainement il faut que ie vous confesse, SIRE, que le peril de l'accroissement de telle doctrine me semble emporter à la balance toutes les considerations qui pourroient estre au contraire.

CAR quant à refuter les opinions nouuelles en la Religion, nous pouuons dire avec verité, que tout ainsi que durant les cinquante premieres annes les erreurs de Luther & de Calvin ont esté superbement proposees, preschees, & publiees: de mesmes depuis vingt-cinq ou trente ans elles sont magnifiquement & brauement refutees & de viue voix, & par escrit, surpassans infiniment en profond sçauoir tout ce que les autres firent iamais. Tellement que si les auteurs de telles opinions reuenoient au monde, i'estime qu'ils s'en departiroient, trouuans tous leurs grands arguments, & dont ils faisoient tant d'estat, entièrement refutez.

A VSSY nous voyôs que les premiers & plus habiles d'entr'eux se remettent chacun iour au giron de l'Eglise, dont il me semble que nous deuons tous receuoir vn merueilleux contentement. Car ces heureuses conuersions ne se font point avec les gehennes, les tourmens, & les apprehensions de la mort, à la mode de l'Inquisition d'Espagne (à laquelle & aux armes de Castilles les Iesuites attribuent la conseruation de la Religion Catholique, ainsi qu'il a esté monstré ci-dessus:) mais par le glaue du S. Esprit, & la Parole eternelle,

qui est enseignee doucement par nos Docteurs, Pasteurs, & bons Euesques, qui ne me semblent en rien ceder en doctrine aux peres Iesuistes. encores qu'ils se seruent quelquesfois de leurs argumens, qui sont tresbons & treforts. Et croy que nous deuons aussi soigneusement recueillir leurs liures sur les points controuersez en la Religion, comme reietter au loin ceux qui respandent ceste doctrine, dont nous auons parle ci dessus.

Ie vous diray bien, qu'encores que les peres Iesuistes ayent quelquesfois ayde à des conversions, si est-ce qu'ils ne m'y semblent point si heureux que nos Euesques & Docteurs. Leur façon trop austere, trop esloignée du naturel du François, estonne le monde du premier coup. Ils pratiquent si souuent avec les estrangers, & se sont tellement formez au patron de leur fondateur, Espagnol de nation, qu'ils retiennent (au moins la pluspart d'entre eux) vne trop grande seuerité en leur visage, en leur port, en leur maintien. Encores se faut il accommoder à l'humeur du malade, & luy choisir des Medecins agreables, qui veult le bien guerir. Les Iesuistes ne le sont nullement aux François. Ils ont si furieusement entonné de grands blasphemes contre le feu Roy, que cela fait encores horreur. Les François ont ie ne sçay quelle inclination naturelle à aymer leur Prince, qui leur fait soufleuer le cœur & tressaillir quand ils entendent qu'on parle si cruellement de leurs Rois. Ie leur fis dire vn iour (car ie les ay aimez & parauanture plus que ie ne deuois) que i'estois marri de les voir

si acharniez contre vn mort : & me sembloit que les seruices que ce pauure Prince auoit faicts à l'Eglise, iusques à y porter son sang & sa vie, tant de fois, en tant de batailles, en tant de sieges, meritoient bien de pardonner quelque chose à sa memoire. Ils firent response à vn qui estoit fort leur confident, à qui i'en auois parlé, qu'il y auoit de l'apparence en ce qu'il disoit, mais que le temps requeroit cela, qu'il falloit à ce coup establir la Religion Catholique en France, ou iamais. I'entendis bien ce qu'ils vouloient dire, & qu'ils auoient resolu de rendre odieuse au peuple la Monarchie sous laquelle il auoit vescu si long temps, & lui faire changer de maistre, en esteignant la maison de Bourbon. Et quand i'apperceu depuis les garnisons des Castillans & Napolitains dans Paris, ie vi le commencement de l'execution de leur response. Et ne faut point vous le deguiser, SIRE: ie pensois bien que le ieu fust ioué, que vostre Majesté n'entreroit iamais dans Paris, & qu'à la longue les moindres villes cederoyent aux principales.

Dieu, qui a tousiours eu soin particulier de la premiere Couronne des peuples baptizez en son nom, en a ordonné autrement: & par vrais miracles vous a rendu paisible de tout ce grand Empire, malgré vos ennemis. Et pour comble de felicité, vous a donné vne belle, genereuse & tres-vertueuse Princesse, & dans les dix mois vn autre vous-mesmes, preuenant nos vœux & nos esperances.

Le soin de ce ieune Prince, plus encors que de vostre personne, excite vostre Majesté de

deliberer avec tresgrande maturité sur tous les importans affaires de son Estat, dont à la verité celuy-ci faiet partie. Et se faut necessairement resouldre à l'vn des trois aduis; ou de contenter les Iesuites, ou de les faire obeir à l'Arrest qui les bannit tous hors du Royaume, ou de laisser les choses en l'estat qu'elles sont.

Je commenceray par le dernier, d'autant qu'il semble de premier oeil le plus plausible, & neantmoins c'est celuy en effect qui a le moins d'apparence; estant sans difficulté, qu'il faut remettre les Iesuites par tout, ou les faire obeir par tout. Ces bigarrures sont laides, sont perilleuses, touchent à vostre reputation, à vostre auctorité. S'il est iuste & vtile de les retenir, il faut qu'ils demeurent citoiens, & non bannis: sinon, il faut qu'ils sortent, & que par leur opiniastrété ils ne monstrét point exemple de rebellion, ainsi qu'ils ont faiet trop long temps. Les Lacedemoniens n'enuoioient qu'un morceau de parchemin grand comme la moitié du petit doigt, sur l'heure il falloit executer le commandement. Il est du tout necessaire que vostre Majesté soit obeïe à Bordeaux & à Thoulouse, comme à Paris, comme à Fontainebleau: vous y auez des seruiteurs, & en bon nombre. Ce que vous commanderez en Roy, en Maistre, sera executé; & n'en doutez point. Mais si les Iesuites ne vous sont vtils, ne les laissez pas enraciner d'auantage en ces deux prouinces. L'arbre que vous pouuez arracher d'une main cette année, aura besoin des deux la prochaine, & en la troisieme il y faudra le picq & la coignée.

Ce voisinage d'Espagne nous doit estre fort suspect. On les a tousiours accusez d'estre Espagnol: ils l'ont fait cognoistre par toute leurs actions: & que tant plus la plainte estoit vieille, tant plus elle estoit veritable, tant plus elle estoit iuste. On les a chassez du surplus du Roiaume, mais les voila qui se tetranchent en deux prouinces voisines d'Espagne, dont ils sont venus. Quel exemple d'umilité & d'obeissance; S'il y a lieu où on les doïue moins laisser fortifier, c'est sur vne frontiere esloignee de nostre Soleil, & qui s'approche de celui de Madric. Il semble que les Espagnes leur fassent espaule: il semble qu'ils s'aillent là barricader contre vostre Majesté: & dire, Nous nous auez chassez de Paris & d'ailleurs, mais vous n'aez pas les bras assez longs pour nous pouffer plus auant. Cest trop. Je nescay pas comme l'entendent quelques pretendus Escheuins, autresfois leurs escholiers & cōfites en leur humeur, qui se bandent si fierement pour eux: Mais si faut-il qu'ils sçachent, qu'ils vous doiuent, СИКЕ, autant d'obeissance que le moindre de Paris. Il y en cela trop d'arrogance, trop de mescognoissance. Iusques ici vostre orbité leur a esté à mespris (disoit vn ancien) faictes leur cognoistre qu'ils ont à vous obeir & à toute vostre posterité à iamais: il n'y en aura vn seul si haut monté qui ne tréble. La memoire des offenses faictes au pere, ne se perd iamais par le fils.

IL FAUT donc, SIRE, ou que les Iesuites obeissent, ou que vos Arrests soient cassez: & voila la grande deliberation.

SIRE,

SIRE, beaucoup de gens se resiouiront du premier, & beaucoup du second. Pour moi, ie n'estime point que vostre Majesté doiuë tât regarder à ce qui sera agreable aux vns ou aux autres, comme à ce qui est iuste & à ce qui est vtile. Vous ne sçauriez faire en sorte, que plusieurs ne soient ioieux, & plusieurs marris. Si se faut-il resoudre, & ne flucter pas tousiours. Quelles meilleures ancrs peut-on choisir, que l'Vtilité & la Iustice qui comprend l'honneur;

QVANT à la Iustice, Dieu la mise es mains des Rois. Or vos predecesseurs, **SIRE**, s'en sont de toute ancienneté deschargez sur la conscience de leur Parlement des Pairs: & pour l'affluence des affaires, ils en ont institué iusques à sept autres: Mais le Parlement des Pairs a tousiours retenu cette autorité & prerogatiue (comme il estoit bien raisonnable & necessaire) qu'il decide ce qui va au general de l'Estat. Cette Compagnie est remplie de tres-grands personnages infinimēt versez en toutes sortes de matieres, & sur tout ils excellent en ce qui est de la confection & iugement des procez criminels. Car s'il y a gens au monde qui y apportent grande cognoissance de cause, c'est eux. Aussi on n'a iamais veu accusé, se sentant innocent, qui ne les ait plustost demandez pour Iuges, que tous autres. Vostre Majesté en sçait quelque chose.

Or ce n'est pas depuis peu qu'ils ont oui des plaintes contre les Iesuites. Car des l'an 1564. ils ont entendu dix Aduocats en vne seule fois plaidans contre eux: Dont celui qui parloit

pour le public, homme de bien, & seruiteur affectionné de son Maistre, s'il y en eut iamais, pronostica (chose estrange & esmerueillable!) toutes les actions & deportemens que nous auons depuis reconnu en eux.

Quand on a veu aduenir ce qu'il auoit preueu: Premièrement la ruine de l'Vniuersité, qu'ils ont reduicte à trois mil escholiers, au lieu de trente mil, ainsi qu'il a esté dit au commencement: & qu'on a veu petit à petit les subiects se soubstraire de l'obeissance qu'ils deuoiennent à leur Prince, & tourner la veüe vers vn autre pole: Cela a commencé à faire fremir vn chacun, & dire tout bas (car les Iesuites auoient desia establi leur puissance, & s'estoient rendus redoutables :) L'Aduocat du Roy du Mesnil nous l'auoit bien dict, nous ne l'auons pas voulu croire; ni la Sorbone, qui au mesme temps auoit predict que cette société estoit nee pour la destruction, & non pour ledification; qu'elle apporteroit des troubles, & nuirroit grandement aux Princes temporels (qui sont les propres mots de son decret.) Vostre Majesté s'en peut faire porter l'original.

Mais quand on a veu tout ordre de police renuerlé, les freins de l'obeissance coupez, les Magistrats emprisonnez, voire quelques vns massacrez, & le peuple furieux, comme Lions eschappez, feuir contre tous les gens de bien: & lors les peres Iesuites donner courage à cette populace, & Commolet d'un costé, Bernard de l'autre vomir vn monde de blasphemés contre leur Roy, contre leur Maistre: & au contraire, exalter & faire des Panegy-

rics du Roy d'Espagne, qu'ils figuroiēt le plus grand Monarque du monde, plus puissant, plus grand terrien que ne furēt iamais les Romains, qu'il n'auoit garde de les abandonner, qu'ils luy estoient trop chers, qu'ils eussent seulement bon courage, & recogneussent leurs forces, que iamais secours d'hommes, d'argent, de viures ne leur manqueroit. Alors à la verité tous les gens de bien, qui auoient encore les Fleurs-de-Lis grauees dans le cœur, se sont infiniment repentis de n'auoir creu ces Cassandres, mais il n'estoit plus temps.

QUAND vostre Majesté, SIRE, eut reduit Paris en son obeissance, chacun croioit asseurement, que sur l'heure vous chasseriez ces mauuais eschançons, qui auoient empoisonné grande partie de vostre peuple, & qui s'estoient si ouuertement declarez ennemis iurez du feu Roy & de vous. Mais vostre Majesté tres-prudemment voulut laisser l'affaire entre les mains de la Iustice. L'Vniuersité, qui, avec beaucoup de raison, attribuoit sa ruine particuliere aux Iesuites, outre ce qui estoit de la generale, presenta sa requeste à vostre Parlement en May 94. Les Curez de Paris firent le semblable. La cause fut plaidee, mais à huis clos, qui ne fut pas vn petit aduantage aux Iesuites. Car la pluspart de ce qu'on disoit contre eux, eust peu estre tesmoigné par l'assistance à huis ouuert, & nouuelles charges fussent venuës pendant les diuers iours que la cause fut plaidee. Aduint ce coup, que Dieu destourna de vostre gorge, & vous rempara de vos dents mesme. Personne ne douta d'ou il venoit:

sur tout, quād on sceut que c'estoit vn nour-
rison des Iesuïtes, qui disoit auoir appris
d'eux, *Que le Roi estoit encores hors de l'Eglise,*
& qu'il le falloit tuer ? comme il a depōsé en
plein Parlement. Cette extreme & malheureu-
se resolution ne pouuoit aussi venir que de ces
fieres & farouches maximes, dont nous auōs
parlé. Telles conceptions ne croissent point
naturellement, & sur tout au cœur des Fran-
çois esloignez de l'Afrique, & qui n'auoient
point veu de monstres auant que les Iesuïtes y
fussent entrez. Nostre terre ne produit point
ce poison d'elle mesme, il faut necessairement
qu'il y ait esté semé.

ON VA donc en leur College, on trouue en-
tre autres choses, vn discours du Pere Gui-
gnard, tout escrit de sa propre main, qui con-
tenoit le suc & la moüelle de toute ceste do-
ctrine furieuse, sanglante, hideuse. Tout cela
estoit conforme à ce qu'on auoit preueu, mais
non creu des l'an 64. & à ce qui auoit esté tout
recentement predict. Le procès est donc plei-
nement & solennellement instruit, les deux
Chambres assemblees. Guignard recognoist
son escriture : Chastel dict en presence de
tous Messieurs, que c'estoit le propos ordi-
naire des Iesuïtes, *QUE LE ROY ESTOIT EN-
CORES HORS DE L'EGLISE, BIEN QUE CATHO-
LIQUE, PUIS QUE L'EXCOMMUNICATION DV-
ROIT ENCORES, ET QU'IL LE FALLOIT TVER.*
Cela dū tout conforme à l'escriture de Gui-
gnard : *Si on ne le peut deposer sans guerre, qu'on
guerroye, si on ne peut faire la guerre, qu'on le face
mourir.* Apres tout cela, SIRE, que pouuoit

rien ordonner vostre Parlement de plus doux que d'enteriner la Requeste de l'Vniuersité, dont il sembloit que Dieu par vne espece de miracle auoit luy mesme voulu estre le Iuge, descourant à nud, & neantmoins sans malheur, ce qui auoit esté dit & redit tant de fois contre ceste société, & que leurs artifices, leurs belles paroles, & leur hypocrisie auoit tousiours empesché de croire assez fermement, pour se haster de s'en deliurer.

Donc avec tresgrande cognoissance de cause, vostre Parlement de Paris donne son Arrest, par lequel ils sont bannis de tout vostre Royaume, & deffences sont faites à tous vos subjects d'enuoyer leurs enfans dehors en leurs Colleges: qui est le grand mot, & sans l'obseruation duquel, vostre Majesté ne peut tirer que la moitié du fruit de l'Arrest. Car ils seront tousiours tres-soigneux d'enseigner ces dangereuses maximes aux enfans qu'on leur enuoiara, & d'en charger leurs consciences de les apprendre aux autres. On vous fait entendre, SIRE, que cela ne se peut executer, que on ne sçauroit empescher les peres d'enuoyer leurs enfans hors du Royaume aux Iesuites, & neantmoins il n'y a rien au monde plus facile: qu'on ordonne seulement vne peine de mil escus pour la premiere fois, dont la moitié appartiendra au denonciateur, & qui doublera autant de fois qu'on contreniendra à l'arrest, & on n'y en verra plus vn seul. Voila pas vne chose bien difficile, pour meriter d'estre appelée impossible?

PAR autre Arrest Guignard est condamné

à mort. L'horreur des blasphemes contre le feu Roy, duquel il estoit subiect, & sa furieuse doctrine contre vostre vie, ne permettoient pas qu'on luy sauuaist la sienne sans hazarder la vostre.

Avssi ces Arrests sont trouuez si iustes & si necessaires, qu'ils furent incontinent executez en tous les autres ressorts, excepté celui de Thoulouse & celui de Bordeaux.

Pour le regard de Thoulouze, il ne le faut pas trouuer estrange: car ils estoient encores hors de vostre seruice, où ils ne furent reduits qu'en Avril 96. Quant à Bordeaux, il y auoit beaucoup de tres-grands Catholiques, mais tres-grands ennemis des Espagnols & des Iesuites, leurs arcs-boutans, qui ne demandoient qu'à les chasser de la Guienne, comme ils auoient esté du reste du Royaume. Mais les Iesuites soudainement aduertis de l'Arrest donné contr'eux, auoient, à leur mode accoustumée, dressé vne grande & forte partie, par le moyen de leurs confidens, dans les villes d'Agen & Perigueux, où les cendres du feu de rebellion estoient encores toutes chaudes. Ils firent donc former des oppositions si estranges si horribles, qu'il n'est pas possible de se rien imaginer de semblable, qui n'auroit point cognu la plume Iesuite. Car en somme, tous les Parlemens qui les auoient bannis, estoient des heretiques, qui auoient forcé vostre Majesté à faire cet Edit. Leurs propres mots sont, que *Les ennemis de la Religion Catholique Apostolique & Romaine ont imbu vostre Majesté de faux faicts pour les rendre odieux & suspects à elle & à son*

*Estat. Et sans autre forme ny figure de procès, ny entrer en aucune cognoissance de cause, les ont exiléz & bannis. Iamais le Parlement de France fut il si meschamment, faullement, & calomnieusement dechiré & vilipendé: Ils ne se contenterent pas de cela, car ils passerent outre, & entrerent en menaces; disans par leurs requestes, *Que l'Estat seroit alteré, & que tel remuement ne pouuoit estre sans alteration.* Du temps du Roy François I. ie ne diray point vne semblable requeste (car qui y eust seulement osé penser ?) mais vn escrit qui en eust approché le moins du monde, eust cousté la vie à quiconque eust esté si hardi de le presenter. Aussi telle outrecuidance, telle insolence, telles brauades, tels outrages procedans d'eux & de leurs escholiers infectez de leur poison, qui est de mespriser les Princes, leurs commandemens, & leur Senat, offenserent infiniment vos seruiteurs. **SIRE**, bien resolu de faire obeir vostre Majesté, sans laisser contreroller ses commandemens. Toutesfois la multitude des villes qui estoient encores rebelles, soustenues de celle de Thoulouse, firent prendre conseil de patienter. On voyoit que la rage & la furie de vos ennemis, qui auoient encores l'espee traicte contre vous, ne pouuoient plus gueres durer, que tout leur manquoit, & qu'apres ce seroit chose de très-facile executiō. Or diuerses considerations, diuerses occurrences l'ont retardée iusques à present. Voila, **SIRE**, comme les choses se sont passées selon la verité, & sans rien deguïser. Voila ce qui a esté iugé & ordonné contre les Iesuites, executé en partie, & en partie non.*

OR vostre Majesté n'ignore pas que la force des Estats consiste en la manutention & execution des Arrests des Cours souveraines. Quand il est question de les renuerfer, il y faut penser beaucoup de fois. C'est vn grand ouurage? & qui a vne merueilleuse suite. Les Arrests portent vostre nom sur le front? on ne les peut violer, sans blesser la Majesté des Rois, dont les iugemens doiuent estre sans retractation, sans variation. A quoy il faut adiouster, SIRE, que parmi ces deux Chambres assemblees on ne scauroit nommer vn seul hōme qui ne soit tres-grands Catholique, sans soupçon quelconque contraire, Il y a sept ans que les Iesuites espluchent leur vie, ont ils peu encores rié alleguer contre quelqu vn d'eux? A quel propos donc, de dire, Ceux de la nouvelle opinion nous haïssent; Cela est veritable: mais que pouuoient-ils en cette Compagnie; Aussi peu que dans le Consistoire de Rome? ie dis aussi peu.

ILs insistent neanmoins, & dient que le Parlement les haïssoit. Je demande, pourquoi; Est-ce pource qu'ils n'auoient point esté à Tours; Comment pourroient-ils dire cela, veu que la plus grande partie de Messieurs de la Cour n'auoient bougé de Paris; Est-ce donc pource que les Iesuites sont grands Catholiques? Encores moins? puis que Messieurs de la Court le sont plus qu'eux, & sans tache d'heresie. Pourquoy est-ce donc qu'ils vous eussēt porté mauuaise volonté; Certainement vous ne scauriez rien respondre qui ait la moindre couleur du monde: si vous ne dites? Ils nous haïssient

haïssoient, d'autant que nous auions esté cause de tous les maux aduenus en France. Mais ie vous respons, que cette raison de haine n'est nullement considerable. Si Catilina eust esté apprehendé, n'eust-il donc point trouué de Iuges à Rome? Il est certain que si: & neantmoins tous les magistrats, tous les bons citoyens le tenoient pour le flambeau de la patrie, il faudroit donc establir vn nouueau Parlement des Pairs pour iuger les seditieux, & ceux qui fauorisent les entreprises estrangeres. Et sur ce propos, SIRE, ie vous diray vn petit mot, que vous recognoistrez estre tres-veritable; C'est que si tous vos subiects eussent aimé les Iesuïtes, ou bien si tous vos subiects vous eussent aimé comme ont fait les Iesuïtes, ils ne vous adresseroiēt pas maintenant tant de belles requestes, vous ne fussiez iamais entré dans le Louure. L'oseront ils bien desnier? quand ils le feront, vostre Majesté ne sera-elle pas neantmoins de mon aduis?

EN fin, voici vn merueilleux artifice: c'est que ne sçachans que proposer contre la iustice de cet Arrest, ils en viennent là de dire; Si Chastel nous auoit chargez, si nous estions coupables, pourquoy ne nous faisoit on mourir? A quoy ie leur respons, qu'ils mesurent le cœur des autres par le leur. Car ayans presidé au conseil sanglant de ceux qui ont fait mourir infinies personnes, afin de rendre leur tyrannie espouuentable, ils iugent que quant à eux, ils meritoient bien vne punition plus rigoureuse. On ne les a donc pas fait mourir; d'autant qu'ils n'ont pas esté iugés

par des Castillans, par des Iesuires, qui aux Terceres firent trancher la teste à vingthuit Seigneurs & cinquante deux Gentils-hommes François en vn mesme iour, sur vn mesme eschafaut, & pendre cinq cens Cordeliers, ou autres Religieux qui auoient presché pour le Roi de Portugal. En France nous sommes ennemis de ces cruautéz, nous panchons tousiours du costé de la clemence, pourueu qu'elle ne soit point inhumaine. Si on eust fait mourir tant de petsonnes, c'eust esté cruauté: aussi, si on eust retenu ceux qui auoient causé tant de barbaries, & qui ne couuent autres choses, c'eust esté vne autre tres-grande cruauté. Que falloit-il donc faire? Les bannir. Cela est excellemment beau dans Tacite; *Messieurs, si vous considerez les meschancetez estranges de ces gens ici, la corde ne peut suffire pour leur chastiment: mais ie sçai vn moien, par lequel vous ne vous repentirez iamais d'auoir esté trop doux ou trop seueres? bannissez les tous.*

Aussi les Iesuites ne sçachans plus que tempester cñtre cet Arrest si vtile & si necessaire à la France, viennent dire, (& considerons iusque où les porte leur rage & leur furie) *Le Parlement de Paris n'est plus à Paris.* Et ie leur demande, Où est-il donc ce grand Parlement de Paris? estimé, admiré par tous les François: par tous les estrangers? Est-il à Madric? Est-ce donc là où vous voulez appeller du Roy & de son Parlement? Est-ce là où vous voulez faire casser triomphamment ce grand Arrest, aussi bien que vous y fistes casser le Decret de Sorbonne de 64? Voyez, SIRE, voyez, ie vous

supplie, leur impudence, leur fierté, leur orgueil: d'oser dire en France, le Parlement des Pairs de France n'est plus en France, *Le Parlement de Paris n'est plus à Paris.* Mais pourquoi voulons nous qu'ils espargnent la Justice souveraine, puis qu'ils enuoient tuer les Rois avec des cousteaux à deux tranchans?

IL est donc iuste, SIRE, il est tres-iuste de faire executer l'Arrest de vostre Parlement; c'est la iustice mesme. On ne se peut fouruoyer en suiuant ce grand chemin, chemin frayé par tous vos ancestres, qui ont esté plus ialoux de l'execution des Arrests de leur Parlement, que de chose du monde. Et autrement, comment se fussent-ils peu asseurer, que leurs enfans, qu'ils ont quelquesfois laissez au berceau, voire dans le ventre de leurs meres, commanderoient à tant de grands peuples apres eux, sans la force de leur iustice, l'appui de leur Sceptre, les pilliers de leur Couronne, & l'affermissement de leur succession?

SIRE, quiconque vous conseille d'esbranler les Arrests donnez en vostre Parlement sur vne grande matiere d'État, n'a iamais bien pesé l'importance, la consequence, la suite d'un tel coup. Vous n'auriez plus rié d'assuré au monde, si vous raualez, si vous rafoiblissiez, si vous renuersiez vostre grandeur, vostre grande force contre toutes les desobeissances de vos subjects, contre toutes les entreprises des estrangers.

VOILA pour la Justice, venons à l'Vtilité. Qui ne voit que cest Arrest, SIRE, se doit mettre entre l'un des bon-heurs que Dieu vous a

entoyez ? Si en neuf mois ils auoient trouué
 vn assassín parmi leur pepiniere, parmi leur se-
 minaire, combien en eussent-ils peu rencon-
 trer en sept ans ? Il y a bien de la difference, de
 faire cent pas, ou d'en faire huit cens mille.
 Quand on a le loisir d'y penser, de dormir des-
 sus, on se rauise souuent : il ne faut qu'un bon
 moment, & comme on dit, il y a 24. heures au
 iour. Mais quád en la mesme ardeur, en la mes-
 me rage, en la mesme furie, en sortant de cette
 chábtre infernale des Meditatiõs, on peut tout
 sur l'heure estre à vos flancs, voila le dâger, Sire,
 voila le peril tout euident. Il ne faut point lo-
 ger en des hostelleries, il ne vient point d'aduis
 de Lion (vous sçauiez bien ce que ie veux dire)
 il n'y a diuersité de langues, ni diuersité d'ha-
 bits : on ne peut receuoir aduertissemens ny
 pourtraits de nulle part : aussi tost resolu, aussi
 tost executé. Qui doute que la peste la plus
 pres de nous ne soit la plus à craindre ? Passons
 outre : iugeons par leurs deportemens ce que
 nous pouuons esperer de ces gens ici à l'aduc-
 nir. Mais deuant toutes choses, SIRE, il est rai-
 sonnable de leur accorder ce qu'ils vous de-
 mândent : sçauoir, que vous ne vâgiez point les
 quetelles d'un Roy de Nauarre, d'un Duc
 d'Orleans : Cette requeste est fort iuste. Tout
 ce que les Iesuites ont fait contre vostre Ma-
 jesté, par le commandement qu feu Roy, ne
 leur doit point nuire : ie diray plus, il leur doit
 profiter. Ils ont serui leur maistre, vous ne l'e-
 stiez pas lors. Aussi n'en a-on iamais ouuert la
 bouche contr'eux : c'est se feindre des mon-
 stres, afin de les debeller, ce qui leur est ordi-

naire: Cela ne leur a iamais esté objecté, & n'eust point eu d'apparence en vostre Parlement. On l'a pris tout autrement, tout au contraire: car entre infinies autres choses on a regardé comme ils s'estoient portez enuers le feu Roy. Que s'ils l'ont bien & fidèlement serui en son besoin, en son affliction, quand scauroit esté contre son propre fils (s'il en auoit eu vn) ils meritent louange. Mais le feu Roy n'estoit point Roy de Nauarre, ny vn simple Duc d'Orleans: il estoit Roy de France. Je n'adiousteray point qu'il estoit leur bien-faicteur, & qui les fauorisoit en toutes choses, ignorant les meschancetez horribles qu'ils couuoient contre luy. Car quand i'ay dit, qu'il estoit Roy de France, i'ay tout dit. C'estoit leur Maistre, ils estoient nez ses subjects, il le falloit seruir, quel qu'il fust, (& en fut-il iamais vn meilleur?) l'ont-ils faict? l'ont-ils fidèlement serui, ou s'ils l'ont meschamment trahi? Voila le fort de ce point: c'est-là où il faut lutter, & non pas voltiger & chercher des campagnes larges, & des lieux communs plausibles, pour faire paroistre son eloquence: il faut venir au nœud de cet article. Escoutez moy bien, Messieurs les Iesuites, ie ne parle point d'un Duc d'Orleans, d'un Roy de Nauarre: ie parle de vostre Roy: Auez-vous serui ce Maistre, ce bon Maistre, ce bon Roy, qui auoit tant faict de cas de vous? qui vous auoit tant chers, qui vous auoit tant flatez? I'ay beaulx interroger, ils n'ont garde de me respondre. Que scauroient-ils dire sur cela, que vostre Majesté ne demente? Je ne veux autre

tesmoin qu'elle, de ce que le feu Roy disoit d'eux. Iamais Prince ne fit tant de plaintes, & si iustes plaintes de trahisons de siens subiects. Aussi ce Roy doux, benin, & debonnaire iusques à l'excez, les fit entre tous ses subiects, chasser de sa ville de Bourdeaux: argument infallible qu'ils l'auoient extremément & infiniment vlcéré & offensé.

Mais qui en peut douter? ne scauons nous d'oc pas encore, qu'il auoit veu par escrit & tres bien verifié, qu'ils estoient les vrais auteurs de la Ligue, qui auoient enforcé grands & petits par leur beau langage, noué & conduit cette conspiration contre l'Estat, & poursuui à cor & à cri l'excommunication contre sa Majesté dans Rome, & fait esclater ce tonnerre en France: aians imbu les subiects de cette malheureuse croiance; que leur Roy auoit peu estre excommunié; qu'il n'estoit plus roi, ains Tyran; & qu'ils estoient deliurez du serment de fidelité? Et qui est si malin entre nous, qui ne voie que si Iaques Clement n'eust esté empoisonné de cette doctrine Iesuite, il n'eust iamais seulement pensé à entreprendre de massacrer son Maistre, son Seigneur, & son Roy? N'est-ce pas cette abominable persuasion, ferme & fixe en son esprit, qui luy fit enfoncer le cousteau dans le ventre de l'Oinct de Dieu? qui luy roidit le bras, & fit redoubler le coup, croiant que cet acte heroique (ainsi que l'appelle Guignart) le porteroit en Paradis? Et-ce la pierre, est-ce le trait qui fait le meurtre, ou celui qui le lance? Qui est, dis-je, si malicieux, ou si ignorant, qui ne sçache que quand

les Iesuites sont entrez premierement en ce Royaume, tous les esprits des François estoient si esloignez de telles heresies (car autrement ne les peut on appeller ; y en a-il de plus dangereuses ?) qu'entre vn million de personnes il nes'en fust pas trouué vn seul qui y eust voulu seulement auoir pensé ? Au contraire, nos ancestres ont percé les montagnes, & trauersé l'Italie, pour aller prendre prisonnier celuy qui auoit voulu excommunier le Roy de la Fleur de Lis, & ont fait faire amende honorable à vn audacieux qui auoit commencé de ietter quelque scintille d'un tel feu; Bref auant la venue de ces gens ici, rien ne fut iamais tant esloigné de ces malheureuses maximes, que le cœur des François.

L' A P O L O G I E, de Iaques Clement est, dit-on, aduouee par Boucher: cela est bien aisé à faire, Boucher sçait assez qu'il ne reuiendra iamais à Paris; l' Arrest de Guignart est sa condamnation. Les Iesuites se promettent tous les iours d'y rentrer: c'est vn tour d'ami, que de l'aduouër: ils n'en eurent iamais vn meilleur, ni plus confident; aussi n'a-il point estudié en Theologie que souz eux: toute l'Vniuersité le sçait. Mais ne nous arrestons point à cela, ouurons ce malheureux liure, cette malheureuse Apologie; voyons son fondement, sa base; y en a-il autre sinon que le Roy peut estre excommunié; & les subiects deliurez du serment de fidelité ? Que dient, que crient autre chose les Iesuites par tous leurs liures cy-dessus rapportez ? Passons outre: à quoy conclut cette Apologie, sinon à ce qu'on cherche,

à ce qu'on trouue vn Aod? De qui l'a-il appris que de Commolet, & de Guignart, qui escrit; *Si on ne le peut déposer sans guerre, qu'on guerroye: si on ne peut faire la guerre, qu'on le face mourir.* Et plus haut? *L'acte heroïque fait par Iagues Clement, comme don du S. Esprit, appellé de ce nom par nos Theologiens, a esté iustement loué.*

Remarquons ces mots (NOS THEOLOGIENS.) Qui sont ces Theologiens? Est-ce S. Augustin, S. Bernard, & ces autres bons & sçauans peres? Nullement; j'ai monstté tout le contraire: ce sont les reuerends peres Iesuites, qui sont bien autres que ceux-là: ils sont Apostres, ils sôt de la Compagnie de Iesus? & ceux que ie viens de nommer, n'estoient que ses treshumbles seruiteurs, indignes de deslier la courroie de ses souliers. Et au bout, ce pere Guignart qui a escrit ces maximes d'une plume d'acier, toute teinte du sang de nos Rois, est par eux déploré comme vne grand' perte en la pag. 266. de leur dite defense. Qui a il de plus enragé, de plus forcené en cette apologie des assassins?

Mais ie demâde? Si les Iesuites n'approuuoient cette Apologie, permettroiét-ils qu'on la vendist publiquement dans Doüai, comme on fait? y laisseroiét-ils vendre ce discours? Si ne cōseille-je pas de tuer le Roy d'Espagne; j'aimerois mieux estre mort: au contraire, ie dis que quiconque attente à la vie d'un Roi, est damné indubitablement; c'est attenter à Dieu mesmes qui l'a establi.

IL EST vrai que les Iesuites ne peuuent pas empêcher que cette Apologie ne soit
vendue

enduë publiquement dans Doüay. & portee
dans les hostelleriës, pour la debiter aux Fran-
çois. Ces pauvres Religieux n'ont point d'au-
thorité dans les villes obeissantes à la maison
l'Austriche. On n'y tient compte d'eux. C'est
hose estrange que ce que ie diray, mais il est
res-vray.

On sçait la difficulté qu'un François a
l'entrer dans le chasteau de Milan, il faut que
il soit en guise de Sauoisien & avec peril s'il
est descouvert. Que tous les Iesuites qui re-
tent dans la Guyenne & dans le Languedoc
e presentent pour y entrer, & qu'un Pere Ie-
uite de Milan, die qu'il les cognoist pour Ie-
uites on leur baissera le pont, on leur ouurira
es grandes portes. Tant le tac Iesuite surpas-
e toutes les couleurs naturelles: & à la verité
quelles personnes au monde les Castillans
ont-ils plus d'obligation qu'à ceste societé?
qui a tant trauaillé pour l'exaltation & dilata-
ion de leur Empire, à laquelle ils doiuent le
Portugal ainsi que leur histoire le confesse.

Mais d'où vient ceste grande affection des
Iesuites à l'Espagne? La cause est double. La
premiere vient de leur origine Espagnolle, &
par tradition de main en main ils se nourris-
sent, croissent & esleuent en ceste passion ar-
dante.

En second lieu ils posent pour vne maxi-
me quel'Empire des Ottomans ne peut-estre
renuersé que par vn Monarque de la Chre-
tienté, & iettans les yeux de tous costez ils ne

*Vnion de
Portugal
imprime à
Genes, f.
197. b. &
214. b.*

pensent rien voir de si riche, si opulent, ny qui ait de si grands estats que la maison d'Austrie, qui tient l'Empire, partie des Allemagnes & des pays-bas, plus de la moitié d'Italie, toutes les Espagnes & les Indes Occidentales & Orientales, ioinct qu'ils estiment le Roy d'Espagne seul capable de rendre toute la Chrestienté Catholique.

Or vostre Majesté sçait mieux que personne du monde iusques où vont les desseins de la maison d'Austrie, & s'ils se promettent rien moins que ce que les Iesuites leur souhaitent. Trois freres ou beaux-freres vous embrassent depuis Bayonne iusques à Calais, c'est vn Geryon, mais pourueu que leur conseil secret & ceux qui sourdement les rendent agreables à vos subiers sortent tous hors de vostre Royaume ne soyez en peine: Geryon estoit Roy d'Espagne, mais il trouua vn Hercule Gaulois. Vostre Majesté sçait que la fable du cheual de Troye n'a esté inuentée que pour faire cognoistre que cinquante ennemis couuerts dans vn estat feront en vne nuit ce que cinquante mil descouuerts ne sçauroyent faire en dix ans: elle a voulu aussi monstrier que d'ordinaire il y en a qui apperçoient ces ennemis secrets, mais qu'on ne les veut point croire. Certes iusques icy cela est bien aduenu entre nous: car il n'a esté rien dit des Iesuites & de leurs desseins qui ne soit aduenu, & il n'a esté rien dit des Iesuites qui ait esté creu, sinon apres le coup frappé.

Aussi

A V S S I pour se remettre en credit, ils nous disent deux choses; qu'ils sont vn grand nombre, & qu'ils ont fait de grands seruices à quelques Princes. Quant au premier, ie ne sçai à quoy est bon, de nous alleguer cette multitude, si ce n'est pour nous faire peur. A la verité, ie les crains fort dedans le Royaume: mais de dehors ils ne viendront pas assieger Baionne, pourueu qu'il n'y en ait point à Bordeaux qui nous engourdissent. Ils nous veulent parauanture faire croire que leur grande propagation est vn argument de benediction de Dieu; mais voila vne tres-dangereuse & tres-mauuaise conclusion: car ils ne seront de long temps autant qu'estoient les Arfacides ou assassins, leurs semblables; afin de ne parler des Arriens, des Albigeois, des Iuifs, & des Mahumerans. C'est l'argument ordinaire des Lutheriens, que les Iesuistes ont refuté, & apres ils s'en veulent seruir pour eux, cela s'accorde mal.

P O V R le regard de leurs seruices faits à quelques Princes; on n'a iamais douté qu'ils n'aient de la capacité: mais qu'y a-il plus dangereux au monde, qu'un grand esprit qui veut mal faire? A quel propos, tant de vanteries de leurs suffisances: on n'a point dit qu'ils fussent des fots. Ils pourront faire seruice, mais ce sera à ceux qui auront ce bon-heur de n'auoir iamais Pape ennemi, & qui n'auront rien à demesler avec la maison d'Austriche: quiconque aura maille à partir avec elle, s'il se fie en eux, sera trompé tost ou tard, & qu'il s'en assure.

S' I L plaist à vostre Majesté de se faire lire les harangues de ces Gentils-hommes de Pologne

en leur Senat; elle y verra vne Iliade de seditions & de guerres ciuiles parmi les Chrestiens de ces grands païs qui s'estendent du Nort au Leuant, esmeues par les seuls Iesuites, qui y ont plus fait donner de batailles, qu'il n'y en auoit eu en cinq cens ans auparauant. Vostre Majesté en sçait bien quelque chose, s'il luy plaist s'en souuenir: il est vray que nous n'auons point de besoin d'aucunes histoires estrange-res, car nous ne fournissons que trop d'exemples aux autres. Pleust à Dieu que nos plaintes & nos iustes causes de crainte fussent moins veritables!

M A I S ne les redoublerons nous pas, quand nous considererons que leurs reigles & bulles portent qu'ils iurent d'obeir à leur General, *per omnia & in omnibus*, comme à Christ present? Or ie demande; Si Dieu luy mesme de sa bouche nous commandoit quelque chose, ne le faudroit-il pas faire, fust-il question de tuer son fils Isaac? Qui ne voit donc que quand vn miserable homme, nourry dans ces maximes del'excommunication des Rois, viendra à estre enfermé en cette chambre des Meditations, & qu'un second Varades apportera vn commandement de son General, lors que le Prince qu'on voudra assassiner sera tout proche; qui ne voit, dis-ie, que croiant autremét se damner & son ame perdue en desobeissant à son General, il l'entreprendra.

M A I S ie veux que dix, vingt, trente le refusent: il n'en faut qu'un pour nous combler de larmes & de miseres. Certainement ie ne peux comprendre, S I R E, comment ceux qui

continueront d'importuner vostre Majesté, ne se représenteront point ce qu'ils ont desia veu : & ne considereront qu'eux & leur posterité seroient à iamais en opprobre à toute la France, si vn second malheur aduenoit. Je les prie d'y bien penser, & de se souuenir que rien ne se cache si aisément qu'un meschât dessein ; & que nul ne peut penetrer dans le cœur de l'homme & dans ses cogitations, sinon Dieu qui se l'est reserué. Pourquoy donc veulent-ils courir ce grand hazard ?

M A I S s'il s'en trouue d'endurcis (ce que ie n'estime pas) representez-vous, S I R E, s'il vous plaist, qu'ils n'ont point senti le cousteau Iesuite dans la bouche, & que ce n'estoit pas eux que Barriere cherchoit : qu'ils peuuent estre contregagez en lieu où ils ont affaire des Iesuites pour infinis subiets, & qu'il y en peut auoir encore qui croient que la France demeurera trop temps sans guerres ciuiles, si ces trompettes & ces boute-feux ne reuiennent. Chacun vise à ses desseins : chacun pense à ses affaires : C'est à vostre Majesté, S I R E, à asseurer son Estat & celui de sa posterité, contre toutes sortes d'orages, de tempestes, & de tonnerres.

L E P A P E (dit-on) le demande, le desire, le veult : Luy refuserez-vous cela, apres tant d'obligations ? Je respons plusieurs choses. Et premierement, que sa Saincteté, n'aduouera pas ceux qui voudroient persuader à vostre Majesté de faire vne chose fort dommageable, sous pretexte qu'elle en auroit esté pree par celuy de qui elle a receu de grands plaisirs. Car en ce cas voicy comme en parle vn ancien ; *Il n'y a*

rien plus perilleux que les bienfaits, s'ils nous obligent à cette servitude, de faire ce que nous iugerons nous estre pernicieux. Et vn autre encores plus elegamment? Si à la requeste de mon bienfaicteur i'ai fait chose qui m'ait esté fort dommageable, non seulement la grace est esuanouie, mais aussi il me reste vne grande occasion de plainte. Vn Roy de France est reduit à vne condition bien miserable, s'il ne peut recognoistre vn plaisir par autre moien qu'en mettant le feu à son Estat. En second lieu, ie nie entierement que sa Saincteté le desire. Il aime trop la France, il scait qu'il sortira de ce monde, & que cette societé sera perpetuee par subrogation. Lors qu'elle nous assaillira, il ne nous pourra plus secourir Vn Philosophe dit, *Pour cognoistre si quelqu'un veut vne chose, il faut qu'il puisse ne la point vouloir.* Or qui ne voit que le Pape ne peut refuser aux Iesuites, de leur signer toutes les lettres qu'ils desirent? Que diroient messieurs les Cardinaux qui fauorisét le Roy d'Espagne, à partie desquels il paie pension tous les ans? Ne feroient-ils pas des plaintes ameres & estranges, qu'on abandonne au besoin des gens qui supportent tant de trauaux pour la grandeur du saint Siege? Sa Saincteté est donc contrainte de signer tout ce qu'ils desirent? & la volonté forcee n'est pas volonté. Passons outre. Ie demande, Si le Pape vouloit qu'on adioustast Valence au Comté d'Auignon, le feroit-on? il est certain que non. Ce qui frappe au general de l'Estat, n'importe-il pas plus que dix Valences? En quatriesme lieu, j'ay bien appris que les Arrests du Parlement

cassent les Bullés qui sont contre les Libertez
 & Maximes de l'Eglise Gallicane, ou contre
 les Edicts & Ordonnances de nos Rois, ou
 contre les Arrests de ses Parlemens : mais ie
 n'auois encores iamais sceu, qu'en France la
 volonté du Pape puisse renuerser les Arrests.
 Comment se faut-il donc gouuerner en cecy ?
 Il est bien-aisé ; c'est qu'il est besoin de tenir
 sa Sainteté aduertie des principales raisons,
 pour lesquelles il est du tout nécessaire que les
 Arrests du Parlement soient executez. Entre
 lesquelles il en faut remarquer vne, qui n'a
 point encores esté touchée ; C'est qu'en quel-
 ques autres Compagnies & Communautéz
 il s'est à la verité trouué des hommes qui se sôt
 furieusement portez contre le seruice de leur
 Roy, & qui n'ont en rien cédé aux Iesuites ; ils
 sont allez du pair avec eux. Si l'un crioit haut,
 l'autre n'espargnoit pas son poulmō : ce qu'ils
 sçauent aujourd'huy fort bien remarquer, &
 comme orateurs le font merueilleusemēt son-
 ner : Il y en a des discours entiers en leurs liures,
 & en leurs requestes, dont la substance est ; Si
 nous auons bien fait du mal, les autres Religi-
 eux nous ont suivi de pres. Mais ils ne vien-
 nent pas au point, ils n'ont garde, cela se passe
 sous silence : Le voici ; C'est qu'en toutes les
 autres Compagnies, s'il y en a eu de passionéz
 pour l'Espagne, il y a eu d'autres qui seruoient
 dignemēt à Tours, à Caen, à Renes, à Angers,
 à Chalons, & en si peu d'autres villes notables,
 qui resterent en l'obeissance de nostre defunct
 Roy. Ces gens de bien, vraiment Chrestiens,
 vraiment Catholiques, vraiment Religieux

reiettoïët & renuersoient en leurs chaires de verité & non de mensonge, de consolation & non de scandale, la peruerse doctrine de desobeissâce que les Iesuïtes & leurs disciples prechoient continuellement dans les villes rebelles. Mais entre tous les Iesuïtes (c'est chose estrange, c'est chose esmerueillable!) qu'il ne s'en est trouué vn seul, c'est bien peu qu'vn, ie dis encore vn coup, qu'il ne s'en est trouué vn seul, qui depuis 89. iusques à 94. ait proferé vne seule parole qui peust seruir à son pais, à son Prince, tousiours extremes pour l'Estranger, & pour adoucir l'apprehension de sa domination. Apres cela que peut-on dire? qui peut denier que ce ne soit vne conspiration generale, grande, horrible, furieuse? Et aians iailli leur coup, ils nous estiment bien misérables, bien stupides, s'ils esperent qu'on les garde encore, afin qu'en vne autre occasion, aians mieux pris leurs mesures, il nous perdent tous, avec l'Estat.

IL est vray, SIRE, que pour vous oster toute apprehension & sentiment, on dit deux choses: L'vne, que ces gens icy sont fort changez; ce ne sont plus ceux que vous avez veus autrefois, qui vous ont tant donné de trauerses. En second lieu, on remonstre à vostre Majesté, que quand ils voudroient luy mal faire, ils ne scauroient.

Pour le regard du premier, on vous faict parade d'vne grande resolution prise entr'eux, qu'ils ne se mesleront plus des affaires d'Estat. Mais voyons la datte de cette resolution; ils disent qu'elle est de 93. Comment donc, SIRE,

avez vous desia oublié, que depuis ce temps là ils ont voulu vous faire tuer par deux fois? Quelle execution de ce beau resultat? Ne scauons-nous donc pas l'exception generale de tous leurs statuts (si ce n'est pour le bien de la Religion) exception qui s'estend si auât qu'on veut? Mais voulons nous cognoistre commét ils sont resolu de ne se plus mesler de l'Estat & le respect qu'ils luy portent? Il ne faut que lire leurs dites defences conceuës souz le nom de la verité defendue, en la page 226. où ils vsent de ces mots; *Mais quelle creature est-ce cet Estat, voyons-le en face, afin que les Iesuites ne se meslent de ses affaires, & n'encourent l'indignation de ses zelateurs.* Et en la page 231. *Que ces bons Catholiques donc pensent à ce qu'ils disent, les accusans qu'ils se meslent de trop de choses, & qu'ils regardent qu'eux-mesmes ne perdent, l'Estat, faisans si peu de compte de leur foy, & qu'en cherchant LE REPOS DE LA TERRE, ils ne le recourent point, & perdent encores celuy du Ciel.* Est-il possible de faire entendre plus superbement & plus fierement, qu'ils veulent continuer plus que iamais, de perdre & renuerfer l'Estat, qu'ils disent ne cognoistre point? & ont raisõ. Ils n'ont iamais eu en l'ame que la subuersion de toutes les polices, le mespris des Magistrats; & l'esleuement des subjects: Aussi se declarent-ils ennemis iurez de ceux qui CHERCHENT LE REPOS. Et encores est fort remarquable qu'en cette mesme page 229. pour rendre odieux au peuple tous ceux SIRE, qui aiment vostre Estat, vostre Couronne; vostre Sceptre; ils ont fait vn nouveau

mot François, & les appellent **E S T A T I E N S**. Pendant leurs tempestes, ils nous appelloient Politiques; ils n'osent plus vser de ce mot, il est trop deserié, ils en forgent vn nouveau, c'est leur ruse ordinaire.

V O U S voyez donc, **S I R E**, comme les Iesuites executent cette belle resolution, de laquelle neantmoins ils font rempart contre tout ce qu'on remonstre à vostre Majesté. Mais qui a iamais ouy parler, de prendre assurance sur semblables promesses, sur semblables resolutions? l'aimerois autant que les corsaires fissent entendre aux marchands, qu'ils ont conclu en vne assemblee generale, de ne plus escumer, de ne plus voler, & que hardiment ils les laissent nauiger avec eux: Cela est bon à dire à des enfans. Aussi qui est si ignorant aux affaires du monde, qui ne sçache que les Iesuites se meslent de tout, autant & plus qu'ils firent iamais? Il ne faut point aller si loing: nos plus proches voisins gémissent souz leur tyrannie, & ne pensent plus qu'aux inoyens de s'en deliurer. Mais reournant à nostre propos, ie demande; Si les Iesuites estoient reuenus de deça, qui les contrerolle-roit, qui sçauroit tous les portepaquets qui passeroient par leurs maisons, tous les conseils secrets qui s'y tiendroient, tous les aduis qui s'y donneroient? Qui ne voit qu'ils seroient incontinent en pareille liberté qu'en octante huiet? Le diray dauantage; Quand bien on apperceuroit leurs menees contre vostre Estat, **S I R E**, qui estimez-vous qui les aille plus reueler à la Iustice? Qui est-ce qui n'apprehen-

dera

dera de reuoir l'annee octante neuf, & se trouuer encores sous leur superbe tyrânie, & principalement les voyans reuenus apres leur bannissement?

A V S S I quand on apperçoit, S I R E, qu'il est trop difficile de vous persuader, que la mauuaise volonté manque iamais en vn Islesuite; on vient au second poinct, que le pouuoir de vous mal faire leur defaudra. Et afin de disposer vostre Majesté à cette creance, les Islesuites ne manquent par leurs requestes d'exalter vos victoires, & de tourner en nostre langue tous les anciens Panegyrics. S I R E, naturellement les hommes aiment à ouyr raconter leur felicité, leur grandeur, l'assurance de leur Estat, & de leurs enfans, & encore, leurs loüanges. Et à la verité, ie suis tres-aïse quand ie voy des gens qui vous aiment comme leur vie, & qui vous affectionnent de tout leur cœur, pousser vos faits-d'armes & vos triomphes iusques dans les cieux. Cela est deu à la vertu: c'est sa nourriture, c'est son element, c'est sa plus belle recompense. Mais gardons nous, S I R E, ie vous supplie, gardons nous des loüanges de nos ennemis. Les anciens ont remarqué que les plus subtils magiciés enchaînoient en loüant: Gardons nous, S I R E, de ces Sirenes, qui flattent les oreilles si doucement pour endormir les mariniers, & leur faire rompre. Quand vous oiez, S I R E, tant de belles paroles en leur bouche, ne vous souuenez vous point de la vostre blessée par vn de leur seminaire? Quand vous oyez tant de fleurs d'eloquēce; ne vo⁹ souuenez vous point qu'a-

avec cette meſme force d'eloquence leur Princi-
 pal encouragea Barriere ? SIRE, ils vous ſçauër
 bien remarquer par leur requeſte, que ce grand
 Orateur Romain extolloit ie ne dy pas la cle-
 mence (qui eſt touſiours loüable eſtant accõ-
 pagnée de iugement, autrement elle ne ſeroit
 plus vertu) ains la ſotte bonté de Iules; l'extol-
 loit (dis-je) par deſſus ſes cinquante deux ba-
 tailles : Mais ils n'acheuent pas l'hiſtoire, c'eſt
 qu'il l'endormit ſi bien par ſon beau langage,
 qu'il rappella à l'entour de luy ſes plus mortels
 ennemis, qui bien toſt apres tuerent à coups
 de ſilet celui que ny Mars, ni Bellone, ni des
 millions d'hommes armez n'auoient peu of-
 fenſer, Laiſſez-vous enjoler de meſmes, ils ne
 vous eſpargneront non plus : & ſi ils ſçauront
 auſſi bien chanter triõphe, que le meſme Ora-
 teur qui cria depuis : *Peu ont frappé Caſar de la*
main, mais tous l'ont tué de volonte. Ie ſçay bien
 que vous repliquerez, que ce grand Empereur
 eſtoit vn vſurpateur : & ie vous reſpondray,
 qu'une peau de parchemin Romain vo^r peut
 ſelon la doctrine Ieſuite, rendre tyran. Doctri-
 ne qu'ils confeſſent, & s'en glorifient encores
 à preſent, & ne la nieront point à l'aduenir, ſi
 premierement leur General, ſubiect d'Eſpã-
 gne, comme ont eſté tous les autres quatre, ne
 leur baille vne diſpenſe *ad cautelam* de deſgui-
 ſer leur doctrine, à l'effect de rentrer en Fran-
 ce. Mais difficilement trancheront-ils le mot,
 de dire, que le Pape ne puiſſe excommunier &
 fulminer les Rois, & deſlier leurs ſubiects du
 ſerment de fidelité. Comment accorderoient-

ils toutes leurs escritures ? Ces variations seroient nouuelles charges & nouuelles preuues contr'eux.

Retournons à nostre propos : On vous dit donc, SIRE, vous estes trop bien establi, trop craint, trop redouté ; tout tremble sous vous, que vous scauroient faire les Iesuites ? Voila qui est fort beau ; & d'autant plus beau, qu'il est pour la pluspart veritable ; donc bien nous prend, & dont ils sont tres-marris. Mais deuant toutes choses ; considerez, s'il vous plaist, SIRE, que ceux qui vous font tant magnifier vostre pouuoir, se sont maintenus en deux prouinces de vostre Royaume, contre vostre Edict, contre vos Arrests. Je scai bien que depuis quelques annees ils ont vne espece de surseance ; mais ils n'en ont pas tousiours eu. Apres cela, SIRE, vous vous souuiendrez, s'il vous plaist, qu'en Mai 84. le feu Roy estoit tresbien establi dans l'heritage de ses freres, de son pere, & de son aieul : il estoit appuié d'un frere qui tenoit beaucoup de gens en eschec ; & neantmoins dans quatre ans apres les Iesuites l'ont chassé du Louure. Je di eux ; les autres n'ont esté que les bras & les iambes ; ceux-ci estoient la teste, qui conduisoit la barque. Qui le scait mieux que vostre Majesté ?

Et neantmoins, SIRE, pour vous dire franchement ce que ie pense, sans vous croire les iustes craintes, sans les diminuer aussi (ce dernier seroit encores le plus dangereux, la deffiance est vne bonne drogue en matiere d'Estat, vous en auez souuent vüe, & bien vous en a pris.) Pour vous dire donc ce que ie pen-

se, ie ne croy pas que tant que vous viurez (& Dieu vueille que ce soit encores cinquante ans & plus) les Iesuites puissent iouir leurs ieux à huis ouuert: Mais ie m'assure que vostre Majesté demeurera d'accord avec moy, qu'il n'est pas en vostre puissance, ny de tous vos Parlemens, d'empescher que doucemēt, sans y toucher, ils ne respendent leur opinion sur le faict de l'excommunication & de sa force, dans les esprits de vos subiects en tous les lieux où ils se trouueront.

VOILA donc vn mal, non point petit, non point mediocre; mais grand, tres-grand. Et quel plus grand se peut-il trouuer, que de vous faire perdre parauanture en moins de quatre ans vn million de subiects? O la dangereuse peste! Voila, dis-ie, vn mal qui aduiendra de vostre viuant, de vostre regne: quelque diligence, quelque precaution que vous y puissiez apporter vous ne le sçauriez empescher, & vous en souuenez.

ON vous propose des reiglemens, des restrictions, des modifications: on vous trompe. Quels peuuent estre ces beaux reiglemens? Voyons-les, mettons-les sur le tapis. Quoy? Les Iesuites ne parleront-ils plus à personne? Ne verront-ils plus personne? Dequoy seruiron-ils donc? N'instruiront-ils point la ieu nesse? C'est neâtmoins le seul pretexte de ceux qui parlent tant pour eux; encores que la verité soit, qu'ils ont à demy estouffé les lettres, que le grand Roy François, pere des Muses, auoit ramenees en France (& la cause du mal cessant par tout le Royaume, le mal cessera.)

Ils auront donc la ieunesse sous leur verge : & en ce cas comment pensons nous empescher qu'ils ne l'imbuent de toutes ces dangereuses doctrines, dont nous auons parlé?

M A R S , feignons qu'ils n'aient point de Colleges : vous n'empescherez pas tous leurs anciens confreres, la sentine des villes, de les aller voir. Et Dieu sçait si la nouueauté en France a des effects esmerueillables ! Dieu sçait les trompettes & les auant-coureurs, qui seront desia arriuez ! Dieu sçait s'ils sçauront chanter triomphe, & releuer banniere ! Vous ne ferez pas fermer leurs portes, pour empescher qu'on ne les aille visiter. Le pretexte de pieté peut-il manquer à quelque heure que ce soit ? D'auantage, quelles importunitez pense vostre Majesté auoir chacun iour, & du dedans, & du dehors de vostre Roiaume, pour oster tous ces reglemens, toutes ces restrictions qu'on vous propose maintenant, afin seulement de leur ouurer la porte ? Ceux qui vous le mettent en auant, seront les premiers qui parleront pour les faire leuer, & pour remettre les Iesuites par tout. C'est ce qu'ils leur disent à l'aureille ; Prenez cela seulement, remettez-vous là seulement, esbrechons cet Arrest, & ne vous souciez d'autre chose. Combien de solliciteurs auront en leur presence ceux qui en ont tant en leur absence ? Vostre Majesté n'aura plus lors le grand bouclier d'un Arrest de son Parlemēt, qui doit estre inuiolable. Quelle plus belle excuse au monde pouuez vous auoir contre toutes importunitez ? Ce bouclier sera brisé. Que pourrez vous dōc dire, pour empescher qu'ils

ne soient par tout, comme en 88. sinon que ce sont de dangereuses gens ? Hé bon Dieu ! que ne le dites vous dès maintenant ? Vous avez encores la memoire toute fraische de ce qu'ils scauent faire : si vous l'avez perduë, mettez la teste à la fenestre, il est difficile que vous soyiez en lieu de vostre Royaume, dõt vous ne voiez infinies masures de maisons où ils ont mis le feu : infinis orphelins qu'ils ont reduits à la besace. Cela ne vous touche il point le cœur ? Si fait, ie m'en assure : vous l'avez trop bon. Mais leurs solliciturs vous tiennent à la gorge : n'avez vous point de bras ?

VOILA, SIRE, la centiesme partie du mal qu'ils feront de vostre viuant mesmes. Si vous iettez cette fueille de papier en vn coin de quelque cabinet, & que vous la retrouviez vn iour par hazard, vous iugerez si j'auray dit vray.

MAIS, ie veux qu'ils n'osent seulement souffler, tant qu'ils verront vostre visage. La prudence des grands Princes ne doit elle point penetrer au dela de leur vie, & sur tout, aians lignee ? SIRE, quand nos corps sont en bonne disposition, nous ne sentons point infinies incommoditez qui s'aigrissent durant vne maladie. De mesme, quand la santé des grands Roiaumes vient à estre troublee par les accidens qu'il plaist à Dieu de leur enuoier ; beaucoup de mauuaises humeurs se remuent ; qui ne se sentoient point durant la felicité. Ce sôt ces saisons, ces occasions, que les Iesuites attendent de pied-coy ; & ne les perdent iamais. S'ils ne peuuent emporter la place du premier

assaut, ils redoublent leurs forces au second, & puis encores au troisieme. En toutes choses les opiniastres le gagnent. On n'a pas toujours la mesme vigieur, le mesme courage pour resister. Quelles plus dangereuses maladies, que les recheutes, & dont nous soions moins plains quand elles viennent par nostre faute, & sur tout, quand la cause du mal a bien esté recogneuë, & que nous n'auons tenu cõpte de nous en garder? Dieu vueille que i'aye mal prognostiqué, mais ie preuoy qu'en fin le Iesuïte reduira en cendre cet Estat. Nous l'auons veu par luy vne fois embrasé d'un feu si espouuëtable, qu'on le voioit de l'Asie. Il s'est trouué vn grand Roy, plein de valeur, plein d'experience, qui ne dormoit que quand il vouloit, de fer au travail, & d'acier aux combats, qui a estouffé le mal pour cette fois. Mais Dieu ne dõne pas tousiours de ces grãds Princes, & en la fleur de leur aage. Qui ne voit qu'à la premiere nuit de cet Estat, ce feu mal esteind, se rallumera plus grand qu'il ne fut iamais, & perdra nos enfans C'est vous que ie plains, mes pauures enfans; car quant à moy, mon aage caduc m'oste cette apprehension.

I'ENTENS bien, SIRE, quelqu'un qui vous dit à l'oreille: A la verité on vous parle par escrit, & y a grande apparence en ce qu'on vous propose; mais ie ne puis pas comprendre comment les Iesuïtes vous pourroient offrir tant de seruices, si leur doctrine estoit telle que nous la venons d'entendre. Et par auanture, SIRE, que celuy qui vous le dit le croit ainsi, & le fait à bonne intention, comme, la pluspart

de ceux qui vous parlent pour eux, ignorent la verité que ie vous viens de représenter. Et s'ils la sçauoient, ils vous prieroient avec autāt d'affection de commander l'exécution entière de vos Arrests, qu'ils vous importunent aujour-d'huy de les rompre. Voici donc l'esclaircissement de la pure verité.

SIRE, lors que les Iesuites vous ont présenté ces grandes requestes si fallerees, si pimpantes, tant pleines d'attraiets, tant pleines de miel, vous estiez du tout bien avec la Sainteté. Quelle considératiō donc les pouuoit lors empêcher de vous promettre seruice? que pouuoient-ils dire autre chose? falloit-il encores se vanter d'estre vos ennemis iurez, vos ennemis capitaux? estoit-ce le chemin de Paris?

M A I S auez vous, SIRE, remarqué qu'encores que ces Requestes soient infiniment longues, que neantmoins ils n'ont enfoncé, n'ont pas seulement touché ce point de la question, ce nœud de la controuersé, cette doctrine tant perilleuse: sçauoir, S'ils ne croient pas, s'ils n'enseignent pas, que le Pape peut excommunier les Rois, & mettre la main sur leurs Couronnes, qui est la base & le fondement de tous les assassinats perpetrez ou attendez en l'Europe, & la source de toutes les miseres que nous auons endurees depuis que cette malheureuse doctrine s'y est semée hardiment. C'est là, Messieurs les harangueurs, où vous deuez donner, & non pas faire des discours sur l'obeissance que les subiects doiuent naturellement à leur Roy. Voila de grandes nouuelles, n'auiez

VOUS

vous pas tousiours vostre exception? Et quelle est cette exception? La voici? Pourueu que les Rois ne soient point excommuniez par le Pape, lequel peut desslier rous les subiects du serment de fidelité. Voila le point de la matiere. Respōdez nous precisément, & sans tourner? Est-il vray que vous apportez cette exception, ou si c'est vne calomnie? Mais à quoy est-ce que ie perds temps, de leur demander leur opinion sur ce subiect? voila leurs liures qui en sont tous pleins, ils ne crient, ils ne tempestent autre chose. De quelle autre source est venue le mal que nous auons endure? sommes nous insensibles? Qui a faict donc receuoir en France l'excommunication contre le feu Roy en 1589. laquelle sans les Iesuites, n'eust eu non plus de force que celle de 1591. dans Tours, où il n'y auoit point d'ames Iesuites, & engagees avec les estrangers? Ne voyons nous pas que tant s'en fait qu'ils ayent denié ceste doctrine, qu'au contraire ils s'en sont glorifiez, voire depuis leur exil, ainsi que ie l'ay monstre au cōmencement? Mais les estimons nous si simples que de venir par leurs Requestes donner dans ce filet? Il faudroit auoir bien mal leu sa Rhetorique, qui enseigne de passer sous silence les objections qui n'ont point de response: Le lecteur n'y prend pas tousiours garde de si pres, cela s'oublie: Pourueu qu'on responde à chose qui en approche vn peu, c'est assez. Iamais artifice reüssit-il mieux à Orateur, que celui cy aux Iesuites? SIRE, qui a aduertit vostre Majesté. qu'ils passoient sous silence ce grand poinct de la cause? Quelqu'un vous a-il re-

monstré; Les Iesuites retiennent à dire, ils ne parlent point François, ils vous flattent maintenant que vous estes bien au Pape; mais ils se gardent bien de dire ce qu'ils feroient, si Dieu nous auoit tant affligez que de retirer le Saint Pere à luy, & de nous donner vn Boniface huictiesme, vn Benoist treisiesme, vn Iules second, qui nous enuoiaist vne excommunication semblable aux autres fulminees contre nos Rois Tres-Chrestiens, Tres-Catholiques & les premiers Rois de la Chrestienté. Nous auons recogneu, SIRE, par leurs liures par toutes leurs actiôs, & par tant de predications qu'en vn tel coup, si on les vouloit croire, ils feroient de vous ou de vostre successeur vn Roy sans subiects, vn Seigneur sans heritage, vn homme priué, particulier, maudit, execré, miserable vagabond; Bref, tel qu'ils ont esperé rendre vous & le feu Roy, & qu'ils vous eussent rendu de faict, si tous les Catholiques de France eussent esté bons Iesuites, comme on vous conseille de les faire, en rappelant ces gens ici, pour les endoctriner & fischer auant dans l'esprit de leur ieunesse ceste ferme croiance, que vous & toute vostre posterité à iamais pouuez, avec vne Bulle, estre chassés du throsne de Saint Loïs.

MAIS qu'est-il besoin de raisons, puis que i'ay des exemples qui vous touchent de si pres? SIRE, vous auez cognoissance de beaucoup d'histoires (Ie vous en ay ouy r'apporter, que des gens qui faisoïent bien les entendus, ne scauoient pas;) mais quand vous n'en auriez jamais appris qu'vne ce feroit celle-ci; laquelle

neantmoins ie reciteray en peu de mots, car il faut necessairement que vous l'ayez oubliée. L'an 1512. il y auoit vingt-neuf ans que la Royna Catherine iouissoit de son Royaume de Nauarre, à elle aduenü par le decez de François Phœbus son frere; & la succession d'infinis ses predecesseurs Rois. Il y auoit dixhuiët ans qu'elle auoit esté couronnée avec le Roy Iean d'Albret, son mari, dans Pampelune: Dieu leur auoit donné vn fils & trois filles: Leur Royaume estoit si florissant & si puissant, qu'il auoit tousiours battu & Castillans & Arragonnois. Ils estoient en pleine paix avec eux, & en estroitte & ancienne alliance avec la Couronne de France, infiniment aimez de nostre Loys douziesme, grand Roy, grand Capitaine; bref, il ne sembloit pas que toute l'Europe eust seulement osé penser de les assaillir; Et neantmoins le Pape en haine des François, lança son excommunication sur ces Rois: deslia leurs subiects du serment de fidelité, & donna leur estat en proye au premier qui le pourroit conquerir (qui est le stil ordinaire.) Par la mesme Bulle nostre Roy est aussi fulminé, comme il auoit desia esté. Qu'aduint-il? Pour le regard des François, il n'y en eut vn seul qui branlast iamais: tout au contraire (& admirez ici nostre bon naturel, SIRE, auant que nous eussions gousté la doctrine Iesuïte, cela vous fera encores mieux cōnoistre la playe qu'ils ont faite en vostre Royaume) tout au contraire, dis-je, tous nos ayeuls, sans vn seul excepter, redoublerent leur courage pour seruir leur Roy, malgré la haine que Iules lux portoit, & augmen-

terent tellement leur amitié enuers leur Prince qu'ils ne le croyét pas où ils le voyoient, & l'appeloient leur pere, leur conseruateur, leur bon Roy: bref le nom de Pere du peuple lui est demeuré & demeurera à iamais.

Av contraire, qu'aduint-il en Nauarre? Le Roy & la Roynes firent assembler leurs Estats à Tudelle: il y est arresté de les seruir iusques à la mort, nonobstant la fulmination du Pape. Mais il se trouua incontinent des seditieux, des mutins, des banqueroutiers, des desireux de choses nouuelles, qui ne manquent point de prendre le pretexte de Religion: il n'y a iamais qu'eux de Catholiques, à les ouyr parler: ces gens-là commencerent à semer parmi le peuple, toute la mesme doctrine que ie vous ay ci-dessus rapportee, laquelle nous auons veu depuis respandre en France par les Iesuites. Qu'aduint-il donc en Nauarre? il aduint que ces seditieux rendirent tous les autres subjects engourdis, sans bras, sans iambes, les vns par Religion, les autres par crainte de ces mutins qui les menaçoient: De sorte que vostre bifaieul & vostre bifaieule, SIRE, se trouuerent au milieu de tous leurs subiects, sans subiects; au milieu de tous leurs seruiteurs, sans seruiteurs: au milieu de leurs armées sans gendarmes: En fin, il ne fut iamais vne defection, vne prodicion si lasche, si honteuse, si miserable: & furent contrains, tenans quatre petis enfans, del'un desquels vous estes descendu, SIRE, de se sauuer en France: faisant vne peau de parchemin en vne heure, ce que tout l'Arragon, toute la Castille n'eussent sceu faire en mil ans. Quand on

perd vn Royaume apres auoir esté rompu en en trois ou quatre grandes batailles, c'est chose qui est aduenü a infinis autres, cela sert de consolation: mais de se voir chasser de son Estat, sans qu'un seul de ses subiects tire l'espee, sous pretexte de Religion, c'est ce qui surpasse tous les regrets, toutes les desolations, toutes les miseres qui se peuuent excogiter au monde.

L'ANNEE suiuiante 1513. nostre Roy esmeu d'une iuste douleur de voir vn Roi & vne Roine despouillees de leur Estat à son occasion, dressé vne armee qui passe les Pyrenées, & s'en va droit à Pampelune: laquelle fut attaquée de si pres, que de L'isle de Villiers, & de Cannay planterent leurs drapeaux sur les murs: mais s'y trouua de si opiniaistres defenseurs, qu'il fallut reuenir sans rien faire. Huiet ans apres, à la priere de Henri d'Albret, Roy de Nauarre le Roy François enuoya vne seconde armee, laquelle prit Pampelune, mais elle fut incótiuent apres reperdue, En ceste guerre Ignace Laiola parut infiniment, & estoit l'un des Capitaines des bandes Espagnoles: il est vray que sa valeur luy cousta vne iambe, & si l'autre luy demeura fort blessée. Ce Capitaine est le fondateur & le patron des Iesuites. Voyez, SIRE, si les disciples ont sceu suiure les traces de leur maistre? s'ils ont sceu continuer l'affection ardente enuers l'Empire de Castille, & la haine extreme envers la France? Le fondateur a grandement aidé a faire demeurer les Nauarrois sous le ioug Castillan? & les disciples ont mis la liberté des Gaulles au hazard d'une bataille

Je dis d'une, car nous ne pouuions perdre vne
 iournee sans vous perdre, SIRE, puis que vous
 n'auiez iamais voulu auoir d'autre retraite que
 la banniere des fleurs de Lis : & en vous perdant
 qui ne voit que la France demeueroit comme
 la Nauarre, serue & captiue sous le ioug, la ra-
 me & la chaisne de Castille? Passons outre : Le
 patron fut l'un des chefs de la garnison Espa-
 gnole dans Pampelune? & les disciples ont mis
 & maintenu durant trois ans la garnison Ca-
 stillane dans Paris. Mais tout cela n'est rien à
 comparaisson de ce que ie m'en vai dire. Les di-
 sciples de Laiola preuoians avec vn vif iuge-
 ment : que le petit fils de ce Roy & de cette
 Roine, ainsi miserablement desheritez, seroit
 vn iour la terreur de Castille, ont fait tout ce
 qui peut tomber en l'esprit des plus iurez &
 mortels ennemis du monde, pour exterminer
 ce rejetton : & le voyant : malgré leur rage, mō-
 té au throsne de saint Loys ; ils ont redoublé
 & leur crainte & leurs efforts contre sa person-
 ne & son Estat, versant en abondance sur son
 peuple le mesme poisō qui auoit autrefois fait
 perdre le Royaume de Nauarre, & qui n'auoit
 iamais peu estre apporté en France, que par ces
 subtils & hardis drogueurs. Rien de tout cela
 n'a esté ignoré par cet heritier de la Roine Ca-
 therine : & neantmoins vne certaine influen-
 ce, vn certain defastre, aussi fatal, aussi inuita-
 ble aux François qu'aux Nauarrois, luy à tan-
 tost persuadé de retenir ces mesmes disciples
 de Laiola en son Royaume dont ils ont esté
 solennellement bannis par ses Parlemēs. Qui
 est ce qui pourra iamais croire choses si estran-

ges, & qu'apres auoir esté si long temps combatu avec la peau de Lion, on se laisse piper avec celle de Renard.

MAIS il ne se trouue pas tousiours des Iules second. Il est vray: aussi ne se trouue il pas tousiours des Couronnes à perdre. Il ne faut point tant de Iules: il n'en faut plus qu'un, pourueu qu'il trouue les François DISPOSEZ aussi bien que les Nauarrois. Considérez, SIRE, considérez deux & trois fois ce que ie m'en vai vous dire. L'excommunication de Iules ne fit tourner vne seule ville en France: L'excommunication de Sixte a fait reuolter Paris, Lion, Rouen, Tholose, Marseille, Amiens, Narbonne, Orleans, Bourges, Nantes, Troyes, Dijon, & infinies autres. Que dites vous des Iesuites? Ne voila pas de braues champions & d'habilles hommes? Si en trente ans ils ont fait vn tel progrez, qu'eussent-ils fait à l'aduenir ayans desia tant de consciences esbranlees, tant de ieunesse endoctrinee, qui montoit chacun iour aux charges? Pourquoi les vieux aux compagnies se sont ils trouuez quasi tous bons François, & les ieunes quasi tous ennemis? Pourquoi auons nous veu tant de fois le fils directement opposé à l'aduis du pere? Sinon parce que les anciens n'auoient point succé le laict Iesuite? Mais voulez vous cognoistre, SIRE, qu'ils sont encores si hardis, de se glorifier d'auoir fait cette grande & horrible plaie dans les esprits de vos subiects, laquelle ils croissent, esgratignent, & augmentent chacun iour? Il ne faut que vous rappoter les paroles que ie vous ai ci deuant transcriptes de

leurs defences. Et partant voyons nous auoir esté
 pratiqué l'usage de ce glaiue en la personne de plu-
 sieurs Rois, en plusieurs Royaumes. Et si la prati-
 que n'a tousiours esté profitable elle la peut tousiours
 estre, SI LES SVBIECTS EVSSENT ESTE BIEN DI-
 SPOSEZ. Voila pas parler bien clairement, &
 dire, Les François n'estoient point anciennement
 BIEN DISPOSEZ à abandonner leurs Rois au pre-
 mier coup de Tonnerre d'excommunication, au
 contraire ils redoubloient leur affection enuers eux
 mais en trente ans nous en auons DISPOSE vne si
 bonne & si grande partie, que peu s'en a fallu que
 nous n'ayons obtenu victoire. Si par nos artifices,
 & recommandations de tant de diuers lieux, nous
 nous y pouuons encor maintenir, nous DISPOSE-
 RONS SI BIEN LES ESPRITS DES FRANÇOIS
 qu'une autre fois nous chäterons le triomphe entier.
 Certainement; SIRE, vostre posterité vous
 aura vne grande obligation, si vous l'asserui-
 sez miserablement à la fantasie du premier par-
 tisan d'Espagne, qui sera esleué au S. Siege,
 en reestabliant ceux qui sont si hardis & si ou-
 tre-cuidez, de semer cette doctrine schismati-
 que, & de s'en glorifier encores; la crier tout
 haut, la publier par tout, qui est tousiours ad-
 uancer l'ouurage. A quoy sont bonnes, SIRE,
 tât de caresses que vous faites à vn Enfant qui
 est au berceau, si au mesme temps vous intro-
 duisez les maçons qui viennent bastir de grâ-
 des fortresses en France, afin qu'au premier
 son de trompette on lui réde tous ses subiects
 aussi estōnez, aussi percluds, aussi DISPOSEZ,
 que furent les Nauarois l'an 1512. N'est-ce
 point assez qu'une telle doctrine luy ait fait
 perdre

perdre Pampelune, sans qu'elle luy oste encores Paris?

IL est vray, que les Iesuites par leurs Requestes vous offrent des cautions, qui vous garantiront vous & les vostres de tout doinnage. Le n'auois encores iamais entendu, SIRE, qu'on prist des cautions en matiere de Couronnes: & à la verité, pardeuant quels Iuges les pourroit on faire appeller, lors qu'on seroit chassé, errant, vagabond par le monde? Si se faut il accommoder. Prenōs donc des cautions, pourueu qu'elles soient soluables; autrement ce n'est rien. Voions quelles elles seront. Entre vos subiects, SIRE, il est impossible qu'il y en ait d'assez riches: car leurs biens ne peuuent estre la milliesme partie de ce tout, dōt il faut auoir assœurce. Entre les Estrangers, qui pourroient-ils presenter suffisant pour respondre du Royaume de France? Le voy bien que n'est, SIRE, la caution qu'ils vous donneront de leur fidelité, de leur affectiō à vostre seruice; est le Roy d'Espagne, qui s'obligera pour eux corps pour corps: Il est si riche, il est si grand terrien, IL AIME TANT LA FRANCE, pourquoy le refusez vous?

VOILA donc qui est bien resolu pour les cautions: pensons au reste. Que deuiendra cette Colonne, SIRE, qui deuant vostre grād Palais, marque dans son marbre à nostre posterité, l'affectiō de tout ce grand peuple enuers son bon Roy, enuers son grand Roy, son liberateur, qui la mesme année luy auroit osté de dessus le col, le ioug Espagnol? Colonne plus honorable, plus glorieuse, que celles de

Trajan & d'Antonin, desiantes les ans, & consacrees à l'immortalité.

LA LAISSEZ vous debout, en faisant neantmoins tout le contraire de ce que vous mesmes auez ordonné par l'Arrest qui y est graué? Que diront tous ceux qui liront l'opposite de ce qu'ils verront? Est-ce là donc ce grand Senat de France? ses Arrests sont escripts en marbre, mais par effect ils sont mesprizez, ils sont foulez aux pieds.

LA verité cela seroit trop honteux. Que faut il donc faire? il faut tout presentement aller abbatre cette Colonne, Comment l'abatre? Y auroit il bien homme si malheureux au môde qui vous voulust donner cet abominable conseil, de réuerfer vous mesmes, SIRE, les trophées de vos plus grandes & plus signalées victoires: noircir vostre memoire de crainte & de pusillanimité, afin que comme nous marquons vn de nos braues Rois pour le premier, qui rompit du tout le ioug de l'Empire Romain, sous lequel les Gaules miserables auoient languit tant d'annees. Aussi que tout à l'opposite l'histoire vous notte à iamais pour le premier qui flechissant souz les mandemens de Rome, auez vous mesmes arraché vos lauriers, flectri vos palmes, & miserablement demoli les monumens de vos prouesses & de vos bien-faicts enuers vostre ville de Paris, le domicile de ce grand Empire, la gloire de l'Europe, & la merueille du monde.

HE! que pourroit souhaiter d'auantage le General des Iesuites, si toute vne grande ar-

mee Espagnole conduite par les siens, & le reste de leurs Seize, estoient entrez dans Paris par la breche, ne commenceroient-ils pas par le bris de cette colonne? Faut-il donc, SIRE, que la France endure sous vostre regne, & par vostre commandement, la plus grande vergogne, la plus grande brauade qu'elle pourroit souffrir de l'insolence de Castille?

SIRE, si le lendemain de vostre heureuse conuersion, à Saint Denis, il fust venu vn Ange du ciel, qui vous eust montré Paris, & dit: Les Iesuites & la garnison Espagnole qu'ils ont mise dans cette grande ville, & qu'ils y maintiennent à force de prescher le peuple en sa faueur t'empeschent seuls d'y entrer, tous les gens de bien t'y desirent: tu y entreras neantmoins, malgré ces meschans, & bien tost: neuf mois apres ils te voudrôt faire massacrer, mais ils ne pourront: ce grand Dieu de là haut destournera le coup, & fera confesser à l'Assassin, que la doctrine malheureuse des Iesuites, & leurs propos ordinaires contre toi, l'ont porté & poussé à te frapper, & Dieu fera que cette declaration sera encores verifiée par escrits de leur propre main. Ils en seront tous bannis: mais sept ans apres tu les restabliras, à la ruine de ton Estat, & desolation de ta maison. Si vn Ange du ciel (dis-je) vous eust fait cette prediction, SIRE, l'eussiez vous estimée veritable? Il est certain que non; tant le dernier point dependant de vostre volonté, vous eust semblé sans apparence. Et neantmoins considererez, s'il vous plaist, combien peu s'en a fallu

que vous n'ayez acheué de l'accomplir, ayant si tost oublié le mal que vous ont fait, & peuvent faire tous les iours ceux qui appellét *Rebelles* nos anciens Rois, d'autant qu'ils n'ont pas ietté par terre leurs Diadêmes & leurs Couronnes au premier bruit des excommunications enuoiées contr'eux : & qui en consequence de cette mesme doctrine furieuse, ont fait croire a infini peuple, que nostre defunct Roy estoit *vn Tyran, & vn rebelle* : Ce qui a vraiment causé sa mort.

NE vous representez-vous point, SIRE, l'image haute, passe, morne, triste, de ce grand Prince, vostre bon frere; tel qu'il estoit lors que tout blessé, tout ensanglanté, il vous témoigna vne affection de pere iusques au dernier soupir de sa vie, vous tenant embrassé au milieu de son armee, toute baignee en larmes, toute grosse de vengeance?

IL est là haut, il est bien-heureux, il est mort pour la liberté de son pays, pour deliurer de captiuité ses enfans; il contemple vos actions. Quoy? que vous cassiez les arrests de son Parlement donnez contre ces parricides qui l'ont fait daguer de son viuant, qui l'ont poignardé apres sa mort, s'escrians en tout l'Europe; *Le mesme iour qu'il nous faisoit chasser de Bordeaux, il fut chassé de la vie. On dit qu'il nous auoit fait mener à S. M. acaire pour nous esgorger là tous, s'il n'eust esté le premier esgorgé.* Ce n'est point, SIRE, vn Iesuite, ce sont tous les Iesuites en corps, qui par leurs lettres annales & solennelles chantent ce triomphe en toute l'Euro-

pe! mais bien par toute la terre en leurs colonies, où ils monstrent maintenant les cruels effects de leurs dangereuses maximes; où, dy-ie, ils monstrent en trophée la chemise sanglante de nostre feu Roy, les despoüilles superbes du premier Roy du monde, foudroyé par les tonnerres qu'ils ont fait esclatter en France, où auparavant leur arrivée ils n'auoient iamais eu aucune force. Nous voudriez-vous bien, SIRE, oster la consolation qui nous reste, & la seule marque, la seule souuenance que nos neveux auront de l'assassinat de nostre défunct Roy, de nostre défunct maistre.

HELAS, mon pauvre Maistre! hélas mon pauvre Prince! si ie n'ay peu autre chose, au moins auras-tu ces derniers pleurs, ces dernières larmes de ton tres-humble seruiteur, de ton tres-fidelle subiect. Et parauanture seront elles accompagnées des souspirs d'un million de François qui me liront, si ce n'est en ce siècle, ce sera aux autres. Car pourquoy mes sanglots, pourquoy mes gemissemens ne dureront-ils autant que les bons François au monde?

Si nos ayeux, SIRE, eussent auallé cette doctrine empoisonnée de l'excommunication, & de la puissance de transferer les Royaumes: cette grande succession ne fust pas venue iusques à vous: il y a long temps qu'on l'eust arrachée à vos ancestres. Le bannissement des Iesuites est la mort de cette malheureuse doctrine, est la vie, la gloire, & la splendeur de vostre maison Royale. Ceux qui vous diront le contraire, la voudroient voir renuersée par terre:

Vous le sçauiez, & le sçachant, si vous n'y remediez, vous sappez vous mesmes les fondemens de vostre Estat, au lieu de les affermir.

La magnanimité, la generosité d'un grand Roy ne se monstre pas seulement à la guerre, au front d'une fiere bataille, animant sa Noblesse, tout couuert de panaches pour se faire marquer à ses ennemis, defiant leur audace & leur forest de lances, qu'il s'en va foudroyer: Mais elle paroist encores d'auantage, SIRE, aux deliberations des grands & importans affaires de son Estat. La prudence y doit reluire: mais il faut chasser arriere toute peur de desplaire, toute crainte de fascher: Elle est indigne de vous, elle est indigne d'un Roy de France, quand il ne seroit point ce que vous estes. Un Roy de France ne reçoit la loy que de Dieu. Voyez, SIRE, ce qui est iuste, voyez ce qui est vtile à vous, à vostre posterité, à vostre Estat: n'ayez autre vifée.

IL est iuste, SIRE, que les Arrests de vostre Parlement, de vostre grand Parlement, du Parlement de France, soient executez en France. En cela gist la principale force de vostre Estat. Qui est donc celuy qui vous conseille, SIRE, de vous couper vostre bras droit à vous-mesmes? En effect, sous noms empruntez, c'est le Roy Philippes qui le desire, qui le poursuit, qui le veut. Il est vostre frere, ie le sçay bien; mais il a un conseil dangereux. Il est ieune, il est ambitieux, il est grand; il sçait qu'il retient iniustement l'heritage de la Royne Catherine, que ce vera rongé l'esprit de son pere au

liet de la mort. De son viuant il se flattoit sur la puissance de Iules: mais quand l'apprehension d'aller comparoir deuant le grand Maistre, deuant le grand Iuge, luy a fait dresser les cheueux en la teste; Alors les flatteries de son Inquisition, les flatteries de ces Iesuites nel'õt peu garantir contre sa propre science, contre sa propre conscience: il a fallu parler, il a fallu resister, & donner soulagement à cette inquietude, à ce flambeau, à ces gehennes. Mais tant s'en faut que son fils vueille executer ce testament, qu'au contraire il a des desseins infinis, incroyables: La seule France luy en arreste le cours. Quel aduantage luy seroit-ce d'auoir tousiours dans les entrailles de ce grand Royaume, des personnes si affidez, si prompts & determinez pour executer tout ce qu'il scauroit souhaitter quelque perilleux qu'il soit? Quel aduantage d'y auoir des espions si vigilans, si hardis, & tellement cogneus pour secrets, que quiconque voudra conspirer contre l'Estat, soit François, soit Estranger, ne craindra iamais de s'adresser à eux. Dans les autres Communautez on pourroit prendre l'vn pour l'autre, & se perdre. Ainsi fit Barriere: s'il ne se fust decelé qu'à Iesuites, vous estiez sans doute surpris. Que firent iamais rien de semblable, les Templiers en France? les Humiliez en Italie? les Cordeliers Conuentuels en Espagnè? La puissance des Rois est infinie, ie le confesse: mais c'est pourueu qu'elle soit accompagnée de prudence (la maistresse vertu des Princes.) Quand les grâdes fautes sont faites, il est bien difficile, & souuent impossible de les reparer.

Qui pensez-vous, SIRE, qui vueille plus rien entreprendre contr'eux, quoy qu'ils machinent contre vostre estat, contre vostre personne? qui vueille plus estre partie, qui vueille plus estre tesmoin, qui vueille plus estre iuge? SIRE, pour vne premiere fois il se trouue des hommes qui s'opposent aux meschans? mais quād ils voyent les serpens à l'entour de leurs maisons, qu'ils viendront vn iour deuorer leurs enfans; cela fait desesperer tout le monde, cela fait du tout perdre courage. Et apres petit à petit chacun plie, chacun s'accommode (ô le dangereux mot pour les Rois.) Si le feu Roy estoit encores au monde, il en pourroit parler: Ce grand defaut l'a mis où il est. Faiçtes vostre profit, SIRE, de son exemple; faiçtes l'encores de celuy de vos voisins: voyez si iamais Charles le Quint, ny son fils, ces grands politics, ces grands rusez en matiere d'Estat, on laisse affoiblir, ont laissé estonner leurs seruiteurs? Voyez si iamais ils leur ont donné subiect d'aller rechercher la grace de ceux qu'ils auoient irritez pour le bien de leur Estat? Voiez si iamais ils ont receu des gens qui leur peussent estre suspects? Quand vostre Majesté ne considereroit que la premiere institution des Iesuites, leur source, leur progres, le lieu dont ils viennent, elle les deueroit auoir en abomination. Mais apres en auoir senty des effects si horribles, tels que vos plus grands ennemis les pouuoient desirer: & apres auoir esté deliuré de ceste dangereuse secte, de ceste dangereuse faction par vn grand Arrest, quelle apparence, quelle couleur de remettre vous-mes-

mes les assassins dans vostre Estat, la sedition parmy vos subiects, les menées & les partialitez dans vos provinces, qui ont plus veu de tranquillité depuis l'exil des Iesuites, qu'en trenté ans auparauant?

-DIEU ne veut point estre tenté. Il vous a par deux fois, SIRE, garenty de leur cousteau: Il vous a enuironné de tant de bons Prelats & Docteurs, de tant de sçauants & deuots Religieux de tous ordres, pleins de probité, de doctrine, d'obeissance, d'affection enuers vostre Majesté, mille fois plus propres pour l'exaltation de nostre Religion Catholique, que ceux qui sont infectez de cette dangereuse heresie, qui a pour fondement, LE POUVOIR DE CHANGER LES ROYAUMES, LES OSTER A L'VN, ET LES DONNER A L'AUTRE. Pourquoi voulez-vous mespriser la grace que sa diuine bonté vous a faicte, vous tirant du cercueil & des bras de la mort? Mort par eux desirée, souhaitée, brassée; voulant enterrer la France avec ses deux derniers Rois dans vn mesme cercueil? Ne craignez-vous point, SIRE, de courroucer celuy, qui veut estre admiré en sa prouidence, & remercié en sa bonté & protection? Doutez-vous qu'il n'ait presidé au milieu de cette grande Compagnie, au milieu de ce grand Parlement, le plus auguste du monde, delibérant pour affaires concernans la vie de leur Prince, & la conseruation de son Estat? Quoy? voulez-vous casser cet arrest? Hé que sçauiez-vous, SIRE, s'il est cause que vous estes encores en vie? Que sçauiez-vous

si Dieu s'est seruy de ce moyen pour vous conseruer en ce monde ! S'il s'est seruy de ce rampart contre leurs assaults ? Pouuez-vous approfondir ses iugemens & ses secrets ? Ne sçauuez-vous pas que ce sont des abysses ?

CE GRAND DIEU, qui d'enhaut cognoist les feintises, les hypocrisies, le venin que couuent les Iesuites dans leur estomac ; Ce grand Dieu, qui sçait leur dessein perpetuel, essentiel, radiqué dans leurs veines ; qui est d'abatre la gloire de cette Couronne & de cette Monarchie ; Vous face la grace, SIRE, de bien discerner les amis d'Alexandre, d'auec les amis des Iesuites. Et en commandant l'exécution entiere de vostre grand Arrest, faire cognoistre à toute la Chrestienté, que vous vous sçauiez aussi bien & prudemment garentir des ruses, des artifices, & des mines secretes de vos ennemis, que rompre, dissiper, & perdre courageusement leurs armées, & leurs forces ouuertes.

F I N.



A LA ROYNE,



ADAME,

Ce seroit renoncer aux
fidelles seruices que no-
stre maison a rendus au deffunct grãd
monarque HENRY, si les deuant
continuer à vostre Maiesté, & au
Roy vostre fils, ie ne les employois
aussi en la deffence de ses bons serui-
teurs : c'est ce qui me fait maintenant
mettre à nud deuant les yeux de vo-
stre Maiesté, les mensonges controu-
uées contre la societé des Peres Ie-
suites, & l'aduertir que si Elle iette
tant soit peu l'œil sur le premier fueil-
let de l'Epistre de celuy (intitulé
l'Anticoton duquel l'auteur, l'ayant
dedié à vostre Maiesté, a peut estre

A

dupli-
cat 2

est legal oublié, ou n'a pas osé le luy presenter)
elle en discernera aussi tost l'impostu-
re d'avec la verité par son beau iuge-
ment, outre ce qu'il y a ie ne scay quels
caracteres dans le mensonge, qui ne
peuvent estre facilement dechiffrez que
par les ames sacrees, comme les Roys
& Anges, Je supplie vostre Maiesté
de recevoir ce que la pieté, & le Zele
m'en a faict escrire, & luy faite tenir
rangen la continuation de mes fidel-
les services, me faisant l'honneur que
de me recognoistre tousiours.

Madame de vostre Maiesté,

Le tres-humble, & tres-fi-
delle subiect, LOVYS DE
MONTGOMERY.



LE FLEAV D'ARISTO-
GITON.

*On contre le calomniateur des Peres Iesuites,
sous le tiltre D'ANTICOTON.*



Vand il n'y auroit autre
raison pour me faire croi-
re queles Peres Iesuites
sont tres-vtiles en Fran-
ce pour la manutention
de la Religion, ie le iugeois par l'extre-
me animosité que les Huguenots ont
conceuë contre eux. Sur ce suiet il
s'est trouué ces iours passez vn mau-
uais petit discours ou plustost inuecti-
ue que nous a produict vn Docteur à
trois lettres, intitulant son traicté L'AN-
TICOTON, mais il deuoit plustost di-
re l'Aristogiton. Nostre mal est, qu'il
se coule souuent parmy nos Docteurs
certains gaste papiers, certains freslons
qui consument les fleurs : des empoi-
sonneurs de ruches : des Ianus à deux
visages, des Ministres encheuestrez

d'un froc d'innocence, des loups garous sous la peau de la brebis qu'ils ont deuoree. Mais voyez cestuy sous la table comme il fait le chien couchât: lisez son factum: vous le conoistrez tout auſſi roſt: c'eſt Lycaon, voilà le galant: ne voyez vous pas ſes pattes pelluës, ſon long muſeau, & ſa dent enuenimee au ſang de toute l'Egliſe. Il n'aboye, ce dit il, que les Ieſuites, mais il veut faire avecque nous la capitulation que l'Apologue Eſope ſaint auoir eſté faicte entre les loups, & les brebis. Les loups demanderent en oſtage les dogues des Bergers: ce qu'eſtant fait ils eurent par apres bon marchè du troupeau. Je ſçay bien qu'on ne treuuera dans ſon foible diſcours rien qui puiſſe contenter vn eſprit fort & ſolide tels que ce ſiecle en a produit: Car ce n'eſt qu'une eſcapade de quelque eſprit leger, vn œuure ſans fonds ny rine, duquel les plus fortes auctoritez ſont puiſſees dans la ſource du menſonge.

Et qui prêdra garde aux fondemens de ſes argumēs treuuera que la poſition n'eſt vatrië. Car ſ'il dit que les Ieſuites ſont coupables & auteurs du parricide

commis en la personne du deffunct Roy, que c'est l'opinion cōmune parmi tous les François & estrangers, que c'est la creance des Parlemens, de la plus part du Clergé, & de la sacree faculté de Theologie: cela estant appertement faux, quel peut estre le reste du Syllogisme?

Il est à noter que toutes les authoritez qu'il cite sont aiustees à son point, deguisees ou falsifiees à la huguenote, ou du tout fausses & controuuees. Or pour accuser les Iesuites de ce detestable coup, il allegue Iean Petit du temps de Charles V I. Cela ne fait rien ny contre eux, ny contre l'Eglise: Laquelle il veut accuser en general sous le nom particulier des Iesuites, | car ils n'ont esté instituez que long temps depuis. Et quant à la proposition: sçauoir s'il estoit licite de tuer les Princes tyrans, elle fut condamnée par le concile de Constance, session 15. Mais de son equiuoque, nous argumentons à son preiudice, que les Iesuites sont du corps de l'Eglise, croyans & ensuiuans les statuts d'icelle, & de ses Conciles défendants de tuer les Roys: donc les Iesuites ne croient ny n'enseignent qu'il faille tuer les Roys

Mais y a il apparence d'accuser tout le corps pour deux particuliers, qui durant les guerres ciuiles ont comme ennemis, l'un escrit & l'autre presché avec animosité, mesmement le suiet qu'ils prenoient lors ayant depuis manqué, l'instruction est demeuree nulle, le pretexte cessant.

Mais quand il veut accuser les Iesuites de cet tēps, il allegue ceux qui n'estoient plus, lors que le malheur nous est arriué. Et pour les conuaincre du parricide de HENRY III. il parle de la mort de HENRY III. Et puis faisant parler Bel-larmin à tort & à trauers, il ne peut si bien se feindre Catholique, qu'il ne nous fasse voir la hart du fagot, voulant à tous coups heurter ce grand bastiment de l'Eglise. Mais il luy faut donner vne saccade du caueçō: & le remettant sur sa carriere, luy dire qu'il ne s'agit pas de sçauoir si quelques Iesuites on dit ou escrit qu'on peut tuer vn Roy Tyran, lequel le Pape aura declaré tel, & dispensé les suiets du serment de fidelité. Car ceste dispute a esté tant de fois vuidée, & ceste erreur refutée par des plumes mieu xtaillées que la sienne: qu'il a mauuaise grace d'y mettre le nez. Mais nous luy demandons la

preuve de son accusation qui est telle: les Iesuites ont fait tuer le Roy HENRY le Grand 4. de ce nom. L'ors il dit que c'est leur doctrine & leur instruction qui a poussé ceste parricide main dans le sein de nostre ROY. Je responds que pour la lecture des liures qu'il allegue, qu'ils sont en Latin tres-obscur, & que Rauail-lac ne l'entendoit pas: qu'estant interrogé à la question, sçauoir s'il auoit creu aucun de ces liures, il a respondu que non & qu'il n'auoit receu aucune instruction des Iesuites: Quelors que l'on preschoit dans Paris contre le Roy, il estoit trop ieune, & n'estoit point sur les lieux pour en auoir, colligé ce meschant dessein. C'est accuser les Iuges & la Roynemeisme, qui si curieusement ont recherché dans cette ame maudite l'origine de nostre dommage & lesquels n'y ont trouué autre suscitation, ny autre coupable que le diable, & luy mesme mais cestuy-cy en veut sçauoir davantage qu'eux, & voulât mal d'ailleurs aux Iesuites, ou plustost à l'Eglise en leur personne, ils'en veut venger en esmouuant le peuple contre eux, ou faire vn schisme dans l'Eglise en les separant.

LE FLEAV

d'auec nous & s'il auoit quelque preuue de sō dire il se deuoit adresser à la royne en particulier & luy en donner aduis mais de le faire imprimer & exposer par des crieurs d'Almanachs à Charenton c'est monstrier son animosité, & crier arme, arme. Or pource qu'il cite Mariana ie dis auec tous les Iesuites que le 5. & 6. chapitre de son liure intitulé *De Rege, & Regis institutione*, sōt tres-pernicieux, & de dangereuse lecture. Mais il l'a mal citée, & adiousté du sien. Et quant à ce qu'il dit que le general Aquaiua l'a approuué comme il luy impose, cela est faux: car tout le liure estoit comme enseuely depuis long temps par son cōmandement, sans les Huguenots qui l'ont fait r'imprimer par les heritiers de Vvechel. Que s'il a causé quelque mal ils en sōt coupables. Et pour ce qu'il fait dire à Gretzer, il est faux, pour le peu d'infirmes auctoritez qu'il cite, cellés-cy suffisent en eschange. Et quand il plaira à vostre Majesté de me le cōmander, ie feray voir que les Docteurs Lutheriens & Huguenots ont plus effrontément prononcé contre les Papes, Empereurs, Roys & Princes que ne fit iamais Mariana, ny aucun Iesuiste.

Vvyclet

Vvyclet au Concile de Constance, session 5. art. 30. *Ala vraye puissance seculiere la iustice du domaine est necessaire, en sorte qu'aucun estat en peché mortel n'est Seigneur d'acune chose, & n'est aucun Seigneur civil, aucun n'est Euesque, aucun prelat, tant qu'il est en peché mortel.* Le mesme, au mesme concile, session. 15. art. 31. *Tout Tyran peut & doit licitement et meritoirement estre tué par quelquesien vassal & suiet, quel qu'il soit, mesmes par embusches occultes, & subtils allechemens & flateries, nonobstant quelconque serment qu'on luy ait arresté, & confederation faite avec luy, sans attendre sentence ou mandement de quelque sorte que ce soit.*

Voilà vn eschantillon de la doctrine de ce bon Patriarche des Huguenots. Ieā Caluin a voulu faire plus le modeste toutesfois vous ne laisserez de voir au trauers de ces douces parolles de quelle façon il deteste les Roys. Sur Daniel, cha. 6. parlât des Roys: *Ce n'est donc qu'abus & déguisement de ce qu'ils se vantent, qu'ils sont regnants par la grace de Dieu: puis qu'ainsi est nous pouuons facilement iuger par là de quel orgueil originel les Roys profanes mesprisent Dieu, encores qu'ils ne prennent pas mesme à fausses enseignes le nom de Dieu, comme font*

ces malheureux, lesquels se moquent de Dieu tout ouuertement, & par ce moyē profanēt ce mot de grace. Le mesme sur le 5. de Daniel Et combien qu'ils se vantent à pleine bouche qu'ils regnent par la grace de Dieu, si est-ce qu'ils mesprisent toute Maieſté diuine, d'autāt qu'ils rauissent à eux la gloire de Dieu, voila quelle est la rage & forcenerie de tous Roys. Et vn peu pl^s bas sur le 6. de daniel, ver. 3.

Car auiourd'huy sans amener les histoires anciennes, selon que les Roys sōt presque tous hebetē & brutaux, aussi semblablement sont ils comme les cheuaux & les asnes, des bestes brutes. Et au verset 22. il passe plus outre & dit. Car les Princes terriens se demettēt & priuent eux mesmes de leur puissance quand ils s'esleuent contre Dieu, voire ils sont indignes auran des hommes. Il leur faut donc pluſtoſt cracher au visage que de leur obeir, quād ils sont si fiers & outrecuidez de vouloir mesme despoiller Dieu de son droit, & quasi ocuper son ſiege comme s'ils pouuoient l'arracher du Ciel.

Mais Buchanan sous l'affeterie d'vn beau langage se peut dire le passeroute: car il encherit par dessus mariana. I'ay recueilli, c'est abregé d'entre milles autres blasphemēs. Attendu que les voleurs qui on

trepassent les bornes de la societé humaine sont punis, ces tyrans là, qui n'ont iamais voulu entrer en ces parcs doiuent estre tenus pour ennemys de Dieu & des hommes, & les mettre plustost au nombre des loups, & de toutes autres sortes de bestes nuisibles, que d'hômes, lesquels qui nourrit, nourrit la perdition à soy & aux autres, qui les tue profite non seulement à soy, mais publiquement à tous.

Et parce qu'il craint qu'entre mille autoritez de la sainte Escriture qui sont cōtre la damnable erreur l'on ne luy obiecte que Ieremie admoneste les Iuifs d'obeir au Roy des Assiriens il dit encore ainsi, De l'exemple de Ieremie qui admoneste les Iuifs qu'ils obeissent au Roy des Assiriens il ne s'ensuit pas qu'il faut obeir à tous les Tyrans plustost qu'il les faut tous tuer, d'autant que Dieu cōmanda qu'Achab fut mis à mort par Iehù chef de ses troupes, & auquel à cette cause recompense fut ordonnée de Dieu.

En fin nostre compte de series rebat pour conclure, & faict vn tiers chapitre à part iutitulé, Que les Iesuites sont coupables du parricide de nostre Roy deffunct HENRY III. Cette Catastrophe, laquelle deuroit estre riche de preuues & d'autoritez, n'est ornee

que de petits contes controuués & propres à reciter en tauerne, entre la poire & le fromage, non pas pour apporter en qualité de preuue sur chose de si haute consequence, comme il se plaint que les Iesuites n'estoient point au conuoy & pompe funebre de l'enterrement du feu Roy. A quoy il faut respondre qu'il ignore les statuts de leur ordre, comme aussi des Chartreux, Celestins, & autres qui ne s'y sont non plus treuuez pour ceste mesme raison. Que si l'on luy demande où estoient les Ministres, il n'a point d'autre raison à alleguer pour eux sinon qu'ils n'auoient pas assez de pieté ny de ressentiment de la perte commune & generale à la patrie. Mais il ne veut pas sçauoir que les Iesuites furent en corps donner de l'eau beniste au defunct le iour de l'enterrement.

Il dit que le pere Coton a eu la curiosité de s'enquerir à vne Demoniaque de la vie du Roy, & qu'au Deuteronomie 18. il est deffendu de s'enquerir du terme de la vie de son Prince. L'vn est aussi veritable que l'autre: il est bien deffendu en ce lieu là de croire aux sorciers, mais de s'enquerir d'vne Demoniaque de la

vic du Prince, il a cité l'escriture à faux: car cela ne s'y treuve point, ny chose approchante.

Il dit que le mesme Coton auoit escrit en Espagne les secrets du Roy deffunct. & que le Roy d'apresent luy a reproché depuis peu de iours: Cela est vne fable. La Roynne mesme a dict que cela estoit vn impudent mensonge, comme aussi a faict Monsieur de Sully en presence de la Roynne, de Monsieur de Ville-roy, & d'autres Seigneurs de marque.

Il dit qu'il a dict à Rauaillac qu'il n'accusat point les innocens. Quand bien cela seroit il ne traîne aucune consequence qui preuue son imposture contre le Pere Coton & les Iesuites.

Pour les nouuelles qu'il dit estre venues d'Alemagne & autres lieux Monsieur de Vauſſemin, dit l'Argentier, ny son fils le Bailly de Troye ne l'aduouëront point de cela, & maintiendront qu'il ne leur est arriué nouuelles de Prague ny par vn Iesuite ny par autres, que long temps apres la mort du deffunct Roy.

Monsieur l'Abbé du bois maintient n'auoir iamais parlé de ce que cet escriuain mensonger dit qu'il a soustenu

au pere Coton estre aduenu en la ville d'Auignon.


Il dit puis apres que le Pere Gontier a presché seditieusement, mais il se garde bien de dire quoy. Or le pere Gontier a presché contre le 31. article de la confession de foy des ministres Huguenots, par laquelle ils declarent le Lieutenant de Dieu en terre le successeur de S. Pierre, le pere commun de la Chrestienté, chef visible de l'Eglise, de laquelle le Roy de France est le fils aîné; Ce Pere dis-je, ils le declarent estre ce grand & pernicieux Antechrist, descrit par Daniel en ses visions, & par S. Iean, en son Apocalypse, blaspheme plus pernicieux que tout ce qu'ils pourroient iamais imposer ny supposer aux Iesuites. Quant à eux en general, & le pere Coton en particulier, chacun sçait assez la perte qu'ils ont faite, & mesme par cest eschantillon: car leur bon Prince, & bienfacteur ne souffriroit pass'il viuoit que l'on les harcelat de la façon, ny que l'on tachast à mutiner la France contre eux. Voila à peu pres la rapsodie de laquelle il conclud la resolution de sa position, à sçauoir que ce sont les Iesuites qui ont fait tuer le Roy. La peine d'un homme de bien est

mal employee à deceler tant de fables: mais baste; encor luy falloir-il dire qu'il auoit tort, non pour bien que ie luy vueille, mais l'on faiet bien peur à vrilimasson, afin qu'il cache ses cornes.

Vn seul conseil luy veux- ie donner: mais peut estre il l'a pris de meilleure heure: c'est de ne dire pas son nom, encor qu'il en nous ait promis, & ce pour obuier aux fausses Propheties, ou bien s'il le fait, il nous produira quelque nom de guerre dont le diable ne s'aduiferoit pas.

Pour moy mon aduis a esté que les peres Iesuites ne fissent aucune response à ce calomniateur, & ie leur ay conseillé de s'aller ietter aux pieds de vostre Majesté, & offrir leurs testes pour expier leur faute, si ce dont il les accuse est veritable; sinon la supplier que l'imposteur soit exemplairement chastié, comme mutin & seditieux, crainte que ce qu'ils nous a predit que nous ressentirions bien plus à l'aduenir nostre perte ne soit veritable. Dieu nous vueille preseruer par sa misericordieuse bonté que la Prophetie de cét oiseau de mauuais presage n'arriue,

F I N.



no 1341

1341





